


宋史

第三函  
第十冊



宋史卷一百一十七

禮志第七十

禮二十 賓禮二

入閣儀 明堂聽政儀肆放儀附

皇太后垂簾儀

皇太子正至受賀儀

皇太子與百官師保相見儀

入閣儀唐制天子日御正衙以見羣臣必立仗朔望薦食陵寢不能臨前殿則御便殿乃自正衙喚仗由宣政兩門而入是謂東西上閣門羣臣俟於正衙者因隨以入故謂之入閣五代以來正衙既廢而入閣亦希闕不講宋復行之建隆元年八月朔太祖常服御崇元殿設仗衛文武百官入閣始置待制候對官乃以工部尚書竇儼待制太常卿邊光範候對仗退賜食廊下乾德四年四月朔帝服通天冠絳紗袍御崇元殿視朝設金吾仗衛羣臣入閣太

宗淳化二年十一月詔以十二月朔御文德殿入閣令史館修撰

楊徽之張洎定爲新儀前一日有司供帳於文德殿

宋初曰文明

是日既

明先列文武官于殿庭之東西百官軍校行軍副使等序班於正  
衙門外屏南階下次御史中丞三院御史序立中丞獨穿金吾班  
過揖兩班一揖歸本位次監察御史兩員監閣於正衙門外屏北  
階上北面立次中書門下文明翰林樞密直學士兩省官分班立  
次司天奏辰刻次閣門版奏班齊皇帝服鞞袍乘輦至長春殿駐  
輦樞密使以下奏謁前導至文德殿殿上承旨索扇捲簾皇帝升  
位扇卻儀鸞使焚香次文武官等拜次司天鷄唱次閣門勘契次  
閣門使承旨呼四色官喚仗南班有辭謝者再拜先退中書門下  
班對揖序立正衙門外屏北階上次翰林學士兩省官中丞侍御  
史序立次金吾將軍押細仗入正衙門後橫行拜訖分行上黃道

仗隨入金吾將軍至龍墀分班揖訖序立次吏部侍郎執文武班  
簿入對揖立次中書門下學士兩省御史臺官入北面拜訖上黃  
道將至午階殿鞞急趨赴丹墀彈奏御史至吏部侍郎南便落黃  
道急趨就位起居郎舍人至兵部吏部侍郎後急趨而進飛至香  
案前皆揖訖序立次金吾大將軍先對揖竝鞠躬殿鞞行至折方  
右位又對揖北行至奏事石位鞠躬一員奏軍國內外平安倒行  
就位次引文武班就位揖訖鞠躬殿鞞急趨入沙墀次引侍從班  
橫行宰相祝月起居畢分班序立文武兩班出序立於衙門外刑  
法待制官赴監奏位中書門下夾香案侍立兩省御史臺官學士  
兵部吏部侍郎金吾將軍監閣御史竝相次出就衙門外立  
惟學士立  
門側北中書門下詣香案前奏曰中書公事臣等已具奏聞訖乃  
候宰相退揖殿出次刑法官待制官各奏事竝宣徽使荅訖乃出就班次

彈奏官左右史出閣內失儀者彈紀如式彈奏官失儀起居郎紀之起居郎失儀閣門使紀之閣門使失儀宣徽使紀之凡出者皆敝鞞急趨揖殿次中書門下學士就位閣門使宣放仗再拜賜廊下食又再拜次閣門使奏閣內無使文武官出殿上索扇垂簾輦還宮其賜廊下食自左右勤政門北東西兩廊文東武西以北爲上立定中丞至本位面南一揖乃就坐食至臺吏贊乃搢笏食訖訖復贊食畢而罷五月朔命有司增黃麾仗三百五十人令文武官隨中書門下橫行起居徙翰林學士位于參知政事後與節度使分東西揖殿出眞宗凡三行之景德以後其禮不行仁宗從知制誥李淑議仍讀時令詔禮官詳定儀注以言者謂未合典禮而罷熙寧三年知制誥宋敏求等言奉詔重修定閣門儀制內文德殿入閣儀按今文德殿唐宣政殿也紫宸殿唐紫宸殿也然祖宗

親朝皆嘗御文德殿入閣唐制常設仗衛于宣政殿或遇上坐紫宸卽喚仗入閣如此則當御紫宸殿入閣方合舊典翰林學士王珪等議按入閣者乃唐舊日紫宸殿受常朝之儀也唐紫宸與今同宣政殿卽今文德殿唐制天子坐朝必立仗于正衙若止御紫宸卽喚正衙仗自宣政殿東西閣門入故爲入閣五代以來遂廢正衙立仗之制今閣門所載入閣儀者止是唐常朝之儀非盛禮也自是入閣之禮遂罷敏求又言本朝惟入閣乃御文德殿視朝今旣不用入閣儀卽文德遂闕視朝之禮請下兩制及太常禮院約唐制御宣政殿裁定朔望御文德殿儀以備正衙視朝之制學士韓維等以入閣圖增損裁定上儀曰朔日不值假前五日閣門移諸司排辦前一日有司供帳文德殿其日金吾將軍常服押本衛仗判殿中省官押細仗先入殿庭東西對列文武官東西序立

諸軍將校分入北向立朝堂引贊官引彈奏御史二員入殿門踏道當下殿北向立次催文武班分入竝東西相向立諸軍將校卽於殿庭北向立班皇帝服鞞袍御垂拱殿鳴鞭內侍閣門管軍依朔望常例起居次引樞密宣徽三司使副樞密直學士內客省使以下至醫官待詔及修起居注官二員竝大起居諸司使以下退排立帝輦至文德殿後閣門奏班齊帝出殿上索扇升榻鳴鞭扇開捲簾儀鸞使焚香喝文武官就位四拜起居鷄人唱時舍人於彈奏御史班前西向喝大起居御史由文武班後至對立位次引左右金吾將軍合班於宣制石南大起居班首出班躬奏軍國內外平安歸位再拜各歸東西押仗位通喝舍人於宣制石南北向對立舍人退於西階次揖宰臣親王以下躬奏文武百僚宰臣某姓名以下起居分引羣臣以下橫行諸軍將校仍舊立閣門使喝

大起居舍人引宰臣至儀石北俛伏跪致詞祝月訖其詞云文武

百僚宰臣全銜臣某姓名等言孟春之吉伏惟皇帝陛下膺受詩

祉與天無窮臣等無任歡呼抃蹈之至歸位五拜閣門使揖中書

由東階升殿樞密使帶平章事以上由西階升殿侍立給事中一

員歸左省位立轉對官立於給事中之南如能轉對官每遇御史參前期牒請文官二員必依轉對官例

先於閣門投進奏狀吏部侍郎及刑法官立於轉對官南兵部侍郎於右省班

南與吏部侍郎東南相向立摺笏各出班籍置笏上吏部兵部侍郎以知審刑官東

西院官充刑法官以知審刑大理寺官充親王使相以下分班出引轉對官於宣制石南宣

徽使殿上承旨宣荅如儀次吏部兵部侍郎及刑法官對揖出次

彈奏御史無彈奏對揖出如有彈奏引給事中至宣制石南揖躬奏

殿中無事喝祇候揖西出次引修起居注官次引排立供奉官以

下各合班於宣制石南躬喝祇候揖分班出喝文武官等門外祇



候出索扇垂簾皇帝降坐鳴鞭舍人當殿承旨放仗四色官蔽鞞  
急趨至宣制石南稱奉敕放仗金吾將軍并判殿中省官對拜訖  
隨仗出親王使相節度使至刺史學士臺省官諸軍將校等並序  
班朝堂謝賜茶酒帝復御垂拱殿中書樞密及請對官奏事不引  
見謝辭班後殿坐臨時取旨其日遇有德音制書御札仍候退御  
垂拱殿坐制箱出外應正衙見謝辭文武臣僚並依御史臺儀制  
喚班依序分入於文武班後以北爲首分東西相向重行異位依  
見辭謝班序位餘押班臣僚於班稍前押班候刑法官對揖出分  
引近前揖躬舍人當殿宣班引轉對班見謝辭並如紫宸儀樞密  
使不帶平章事參知政事至同簽書樞密院事宜徽使並立於宣  
制石稍北宰臣親王樞密使帶平章事使相係押班者立於儀石  
南餘官並立於宣制石南如合通喚閣門使引並如儀贊喝訖係

中書樞密竝揖升殿辭謝揖酒出其合問聖體者竝如儀餘官分

班出

彈奏御史候見謝辭班絕對揖出其朝見如謝都城門外御筵及召赴闕謝茶葉撫問之類不可合班者各依別班中謝對賜酒食等竝門賜其係正衙見門謝辭亦門外唱

放

應正衙見謝辭臣僚前一日於閣門投詣正衙榜子閣門上奏

目又投正衙狀於御史臺四方館應朔日或得旨罷文德殿視朝止御紫宸殿起居其已上奏目正衙見謝辭班竝放免依官品隨赴紫宸殿引或值改依常朝文德殿自有百官班日竝如舊儀應外國蕃客見辭候喚班先引赴殿庭東依本國職次重行異位立候見辭謝班絕西向躬舍人當殿通班轉於宣制石南北向立贊

喝如儀西出其酒食分物竝門賜如有進奉候彈奏御史出進奉

入

唯御馬及擔牀自殿西偏門入東偏門出其進奉出入文武官起居舍人通某國進奉官徽使喝進奉出第六如紫宸儀

候進奉出給事中奏

殿中無事出其後殿再坐合引出者從別儀其日賜茶酒宰臣樞

密於閣子親王於本廳使相宣徽使兩省官待制三司副使文武

百官皇親使相以下至率府副率及四廂都指揮使以下至副都頭竝於朝堂

如朝堂位次不足卽於朝堂門外設次

管軍節度使至四廂都指揮使節度

使兩使畱後至刺史竝於客省廳詔從所定

徽宗初建明堂禮制局列上七議一曰古者朔必告廟示不敢專請視朝聽朔必先奏告以見繼述之意二曰古者天子負扆南向以朝諸侯聽朔則各隨其方請自今御明堂正南向之位布政則隨月而御堂其閏月則居門焉三曰禮記月令天子居青陽總章每月異禮請稽月令十二堂之制修定時令使有司奉而行之四曰月令以季秋之月爲來歲受朔之日請以每歲十月於明堂受新曆退而頒之郡國五曰古者天子負扆公侯伯子男蠻夷戎狄四塞之國各以內外尊卑爲位請自今元正冬至及大朝會竝御明堂遼使依賓禮蕃國各隨其方立於四門之外六曰古者以明

堂爲布政之宮自今若有御劄手詔竝請先於明堂宣示然後榜之朝堂頒之天下七曰赦書德音舊制宣於文德殿自今非御樓肆赦竝於明堂宣讀政和七年九月一日詔頒朔布政自十月爲始是月一日上御明堂平朔左令頒天運政治及八年戊戌歲運曆數于天下自是每月朔御明堂布是月之政先是郡臣五上表請負辰聽朝詔弗允至是復再請始從之十一月一日上御明堂南面以朝百辟退坐于平朔頒政其禮百官常服立明堂下乘輿自內殿出負斧辰坐明堂大晟樂作百官朝于堂下大臣升階進呈所頒布時令左右丞一員跪請付外施行宰相承制可之左右丞乃下授頒政官頒政官受而讀之訖出閣門奏禮畢帝降坐百官乃退自是以爲常其歲運曆數天運政治之辭文多不載是後則各隨歲月星曆氣運推移沿革而易其辭焉初尚書左丞薛昂

條具熙寧以來紹述熙豐政事各條其節目繫之月令頒于明堂  
尋詔月之朔使民知寒暑燥濕之化而萬里之遠雖驛置日行五  
百里已不及時其千里外當前期十日進呈取旨頒布諸州長吏  
封掌俟月朔宣讀之宣和元年蔡京言周觀治象於正月之始和  
以十二月頒告朔于邦國皆不在十月後世以十月者祖秦朔故  
也秦以十月爲歲首故月令以孟冬頒來歲之朔今不當用請以  
季冬頒歲運于天下詔自今以正月旦進呈宣讀四年二月太常  
王黼編類明堂頒朔布政與詔書條例氣令應驗凡六十三冊上  
之靖康元年詔罷頒朔布政

御樓肆赦每郊祀前一日有司設百官親王蕃國諸州朝貢使僧  
道耆老位宣德門外太常設宮縣鈺鼓其日刑部錄諸囚以俟駕  
還至宣德門內幄次改常服羣臣就位帝登樓御坐樞密使宣徽

使侍立仗衛如儀通事舍人引羣臣橫行再拜訖復位侍臣宣曰承旨舍人詣樓前侍臣宣敕立金鷄舍人退詣班南宣付所司訖太常擊鼓集囚少府監立鷄竿於樓東南隅竿末伎人四面緣繩爭上取鷄口所銜絳幡獲者卽與之樓上以朱絲繩貫木鶴仙人乘之奉制書循繩而下至地以畫臺承鶴有司取制書置案上閣門使承旨引案宣付中書門下轉授通事舍人北面宣云有制百官再拜宣赦訖還授中書門下付刑部侍郎承旨放囚百官稱賀閣門使進詣前承旨宣荅訖百官又再拜舞蹈退若德音赦書自內出者竝如文德殿宣制之儀其降御劄亦閣門使跪授殿門外置箱中百官班定閣門授宰臣讀訖傳告百僚皆拜舞稱萬歲眞宗宣制有司請用儀仗四千人自承天殿設細仗導衛近臣起居訖則分左右前導之

皇太后臨朝聽政乾興元年眞宗崩遺旨以皇帝尚幼軍國事兼  
權取皇太后處分宰相率百官稱賀復前奉慰又慰皇太后於簾  
前有司詳定儀式內東門拜表合差入內都知一員跪授傳進皇  
太后所降批荅首書覽表具之末云所請宜許或不許初丁謂定  
皇太后稱予中書與禮院參議每下制令稱予便殿處分稱吾皇  
太后詔止稱吾與皇帝竝御承明殿垂簾決事百官表賀英宗卽  
位輔臣請與皇太后權同聽政禮院議自四月內東門小殿垂簾  
兩府合班起居以次奏事非時召學士亦許至小殿時帝以疾權  
居柔儀殿東閣西室太后垂簾處分稱吾唯兩府日入候問聖體  
因奏政事退詣小殿簾外覆奏太后帝疾間御前後殿聽政兩府  
退朝猶於小殿覆奏哲宗卽位太皇太后權同聽政三省樞密院  
按儀注未釋服以前遇隻日皇帝御迎陽門日參官竝赴起居依

例奏事每五日遇隻日於迎陽門垂簾皇帝坐於簾內之北宰執  
奏事則權屏去左右侍衛事有機速許非時請對及賜宜召亦許  
元殿禮部御史臺閣門奏討論御殿及垂簾儀制每朔望六參皇  
帝御前殿百官起居三省樞密院奏事應見謝辭班退各令詣內  
東門進榻子皇帝隻日御延和殿垂簾日參官起居太皇太后移  
班少西起居皇帝竝再拜三省樞密院奏事三日以上四拜不舞  
蹈候祔廟畢起居如常儀簾前通事以內侍殿下以閣門吏部磨  
勘奉舉人垂簾日引應見謝辭臣僚遇朔望參日不坐竝先詣殿  
門次內東門應擡賜者竝門賜之於是帝御迎陽門幄殿同太皇  
太后垂簾宰臣親王以下合班起居常制分班十六至是合班以  
閣門奏請故也禮官請如有祥瑞邊捷宰臣以下紫宸殿稱賀皇  
帝畢赴內東門賀太皇太后從之徽宗卽位皇太后權同聽政三



省樞密院聚議故事嘉祐末英宗請慈聖同聽政五月同御內東門小殿垂簾至七月十三日英宗間日御前後殿輔臣奏事退詣內東門簾前覆奏又故事唯慈聖不立生辰節名不遣使契丹若天聖元豐則御殿垂簾立生辰節名遣使與契丹往還及避家諱等曾布曰今上長君豈可垂簾聽政請如嘉祐故事蔡卞曰天聖元豐與今日皆遺制處分非嘉祐比布曰今日之事雖載遺制實出自德音又皆長君正與嘉祐事相似有旨依嘉祐治平故事布語同列曰奏事先太后次覆奏皇帝如今日所得旨遂爲定式矣尋以哲宗靈駕發引太后手書罷同聽斷焉

皇太子元正冬至受羣臣賀儀政和初儀前一日有司於東門外量地之宜設三公以下文武羣官等次如常儀典儀設皇太子各拜褥位於階下南向又設文武羣官版位於門之外其日禮直官

舍人先引三公以下文武羣臣以次入就位立定禮直官舍人引

左庶子詣皇太子前跪請內嚴少頃又言外備內侍褰簾皇太子

常服出次左右侍衛如常儀皇太子降階詣南向褥位典儀曰再

拜贊者承傳曰再拜三公以下皆再拜皇太子答拜班首少前稱

賀云元正首祚冬至云天  
正長至景福維新伏惟皇太子殿下與時同休賀

訖少退復位左庶子前承命詣羣臣前答云元正首祚冬至云天  
正長至與

公等均慶典儀曰再拜班首以下皆再拜皇太子答拜訖禮直官

通事舍人引三公以下文武百官以次出內侍引皇太子升階還

次降簾侍衛如常儀少頃禮直官舍人引知樞密院官以下入就

位立定內侍引皇太子降階詣南向褥位樞密以下參賀如上儀

訖退次引師傅保賓客以下入就位參賀如上儀師傅保以下以

次出內侍引皇太子升坐禮直官引文武百官入就位重行北向

次出內侍引皇太子升坐禮直官引文武百官入就位重行北向

立典儀曰再拜在位官皆再拜左庶子少前跪言具官某言元正

首祚

冬至云天  
正長至

伏惟皇太子殿下與時同休俛伏興復位典儀曰再

拜在位者皆再拜分東西序立左庶子少前跪言禮畢左右近侍  
降簾皇太子降坐宮官退左右侍衛以次出

皇太子與百官相見至道元年有司言百官見皇太子自兩省五  
品尚書省御史臺四品諸司三品以上皆荅拜餘悉受拜宮官自  
左右庶子以下悉用參見之儀其宴會位在王公上與師傅係相  
見政和新儀前一日所司設師傅係以下次於宮門外道西南向  
設軒架之樂於殿庭近南北向其日質明諸衛率各勒所部屯門  
列仗典謁設皇太子位於殿東階下西向設師傅係位於殿西階  
之西三少位於傅係之南稍卻俱東向北上師傅係以下俱朝服  
至宮門通事舍人引就次左庶子請內殿通事舍人引師傅係立

於正殿門之西三少在其南稍卻俱東向北上左庶子言外備諸  
侍奉之官各服其器服俱詣閣奉迎皇太子朝服以出左右侍衛  
如常儀軒架作翼安之樂至車階下西向立樂止通事舍人引師  
傅保及三少入就位軒架作正安之樂至位樂止皇太子再拜師  
傅保以下荅拜若三少時見則三少先拜通事舍人引師傅保以下出軒架正安  
之樂作出門樂止左庶子前跪稱左庶子某言禮畢皇太子入左  
右侍衛及樂作如來儀

宋史一百十七終

宋史卷一百十八

禮志第七十一

禮二十一 賓禮二

朝儀班序

百官相見儀制

百官轉對

朝儀班序太祖建隆三年三月有司上合班儀太師太傅太保太尉司徒司空太子太師太傅太保嗣王郡王左右僕射太子少師少傅少保三京牧大都督大都護御史大夫六尚書常侍門下中書侍郎太子賓客太常宗正卿御史中丞左右諫議大夫給事中中書舍人左右丞諸行侍郎祕書監光祿衛尉太僕大理鴻臚司農太府卿國子祭酒殿中少府將作監前任節度使開封河南太原尹太子詹事諸王傅司天監五府尹國公郡公中都督上都護下都督太子左右庶子五大都督府長史中都護下都護太常宗

正少卿祕書少監光祿等七寺少卿司業三少監三少尹少詹事  
左右諭德家令率更令僕諸王府長史司馬司天少監起居舍人  
侍御史殿中侍御史左右補闕拾遺監察御史郎中員外郎太常  
博士五府少尹五大都督府司馬通事舍人國子博士五經博士  
都水使者四赤令太常宗正祕書丞著作郎殿中丞尙食尙藥尙  
舍尙乘尙輦奉御大理正太子中允贊善中舍洗馬諸王友諮議  
參軍司天五官正凡襍坐者以此爲準詔曰尙書中臺萬事之本  
而班位率次兩省官節度使出總方面古諸侯也又其檢校兼守  
官多至師傅三公而位居九寺卿監之下其無謂也其給事諫議  
舍人宜降於六曹侍郎之下補闕次郎中拾遺監察次員外郎節  
度使升於六曹侍郎之上中書侍郎之下餘悉如故乾德元年閏  
十二月詔自今一品致仕官曾帶平章事者朝會宜綴中書門下

班二年二月詔重定內外官儀制有司請令上將軍在中書侍郎之下大將軍在少卿監之下諸衛率副率在東宮五品之下內省使視太卿客省使視太監引進使視庶子判四方館事視少卿閣門使視少監諸司使視郎中客省引進閣門副使視員外郎諸司副使視太常博士通事舍人從本品供奉官視諸衛率殿直視副率樞密承旨視四品朝官兼南班官諸司使者從本品副承旨視寺監丞諸房副承旨視南省都事凡視朝官者本品下視京官在其上開寶六年九月詔曰周之宗盟異姓爲後此先王所以睦九族而和萬邦也晉王親賢莫二位望俱崇方資夾輔之功俾先三事之列宜位宰相上九年十一月詔齊王廷美武功郡王德昭位在宰相上大中祥符元年正月有司上醮宴班位駙馬都尉宮僚員僚皇親大將軍已下行門宰臣樞密使已下穎王皇親郡王



侍衛馬軍都指揮使已上以皇親使相皇親節度使皇親觀察留  
後已下皇親防禦團練刺史三班合爲一節度使觀察留後已下  
防禦團練刺史三班合爲一並重行異位詔依所定既而武康軍  
節度使李端愿言使相亦當合爲一班不當獨行尊異詔令閣門  
再定而閣門引儀制及以前議爲是端愿復伸其議自劾妄言乃  
詔太常禮院與御史臺同詳定禮院言常朝起居班次緣祖宗舊  
制不宜併合從之四年閏三月太常禮院閣門言準詔同詳定閣  
門使李端慤所奏閣門儀制宰臣與親王立班坐位分左右各爲  
班首宰臣樞密使帶使相或帶郡王并使相作一行總爲中書門  
下班其親王獨行一班者準封爵令兄弟皇子皆封國謂之親王  
所以它官不可參綴檢會坐次圖直將宗室使相輒綴親王蓋更  
張之時未見親王遂致失於講求近見朝拜景靈宮東陽郡王顯

亦綴親王班竊恐未安今取到閣門儀制其合班宰臣使相在東親王在西分班立又祥符元年宴坐次圖宰臣王旦與使相石侁吉在東寧王元偓舒王元偁廣陵郡王元儼節度使惟吉在西分班坐其元儼惟吉是郡王與節度使許綴親王班竊慮當時出自特旨今來檢尋元初文字不見在先朝只依祥符元年宴坐次圖子親王及帶使相郡王在西爲一班臣等參詳請依閣門儀制親王在西獨爲一班宗室郡王帶使相許綴親王立班坐次卽係臨時特旨從之熙寧二年四月國信所言大遼賀同天節左番使耶律奭赴文德殿拜表言南使到北朝綴翰林學士班今來卻在節度使之下館伴者諭之始就班時下御史臺閣門同詳定奏稱人使不知本朝翰林學士班自在節度使之下如遇合班卽節度使在翰林學士之西差前別爲一班立俱不相壓欲且依久來儀制

體例詔依所定是月編修閣門儀制所言慶曆中改文明殿學士  
爲觀文殿學士又置大學士按文明殿卽今文德殿乃正衙前殿  
也後唐始置學士序位樞密副使之下每遇紫宸殿坐朝則升殿  
侍立蓋文德紫宸通謂之前殿故學士侍立爲宜其觀文殿深在  
禁中乃與資政端明殿相類而資政端明學士並不侍立竊詳慶  
曆所改職名雖用舊之班著而殿之次序與舊義理不同其觀文  
殿大學士自今遇紫宸殿坐朝請更不升殿侍立從之元祐元年  
五月詔太師平章軍國重事文彥博已降旨今獨班起居自今赴  
經筵都堂同三省樞密院事並序位在宰臣之上百官轉對自建  
隆詔內殿起居日令百官以次轉對限以二人其封章於閣門通  
進復鞠躬自奏宣徽使承旨宣答拜舞而出著爲閣門儀制淳化  
二年詔自今內殿起居日復令常參官二人次對閣門受其章大

中祥符末罷不復行景德三年復詔羣臣轉對其在外京官內殿  
崇班以上俟得替先具民間利害實封於閣門上進方得朝見治  
平中命御史臺每遇起居日令百官轉對御史臺言舊制起居日  
輪兩省及文班秩高者二員轉對若兩省官有充學士待制則綴  
樞密班起居內朝臣僚不與尋詔遇轉對日增二員熙寧初閣門  
言舊制中書省樞密院奏事退再引三班假日則兩班或再御後  
殿引對多及午刻遇開經筵卽至申未恐久勞聖躬請遇經筵日  
自二府奏事外止引一班或有急奏及言事官請對卽取旨俟罷  
經筵日仍舊又言假日御崇政殿每遇辰時則隔班過延和殿再  
引不待進食至巳刻隔班取旨尙許引對請自今隔班過延和殿  
俟已進食再引遇寒暑大風雨雪卽令次日引對詔自今授外任  
者許令轉對訖朝辭監察御史裏行張戢程顥言每欲奏事必俟

朝旨或朝政有闕及聞外事而機速後時則已無所及況往復俟報必由中書萬一事干政府則或致阻格請依諫官例牒閣門求對或有急奏卽許越次登對庶幾遇事入告無憂失時又以編修閣門儀制所言三衙有急奏許於後殿登對若別有奏陳則報閣門如常制或假日御崇政殿則於已得旨對班後續引且許兩制以上同班奏事元豐中詔尙書侍郎同郎官一員奏事郎中員外郎番次隨之不許獨留身侍郎以下亦不許獨請奏事其左右選非尙書通領者聽侍郎以上郎官自隨祕書殿中省諸寺監長官視尙書貳丞以下視侍郎又詔三省樞密院獨班奏事日無得過三班若三省俱獨班則樞密院當請奏事其見任官召對訖次日卽朝辭回任聽旨元祐中宰臣呂大防言昨垂簾聽政惟許臺諫以二人同對故不正之言無得以入今陛下初見羣臣請對者必

眾既人人得進則善惡相襍故於采納尤難帝曰人君以納諫爲上然邪正則不可不辨遂詔上殿班當直牒及帥臣國信使副許依元豐八年以前儀制紹聖初臣僚言文德殿視朝輪官轉對蓋襲唐制故祖宗以來每遇轉對侍從之臣亦皆與焉元祐間因言者免侍從官轉對續詔職事官權侍郎以上並免自此轉對止於卿監郎官而已請自今視朝轉對依元豐以前條制又詔自今三省樞密院進擬在京文臣開封府推判官武臣橫行使副在外交臣諸路監司藩郡知州武臣知州軍已下取旨召對臣僚言每緣職事請對待次旬日遇有急奏深恐失事請自今後許依六曹開封例先次挑班上殿仍不隔班又言諸路監司朝廷所選以推行法令省問風俗朝辭之日當令上殿六曹尚書如有職事奏陳許獨員上殿其羣臣請對雖遇休假特御便殿聽納既又詔應節鎮

郡守往令陞辭歸許登對不特審觀人材亦所以重外任也可於  
監司不許免對條下增入節鎮郡守依此重和元年臣僚言比年  
以來二三大臣奏對留身讒疏善良請求相繼甚非至公之體詔  
自今惟蔡京五日一朝許留身餘非除拜遷秩因謝及陳乞免罷  
並不許獨班奏事令閣門報御史臺彈劾又詔寺監職事上部部  
上省故得上下維持綱紀所出今後雖係兩制職司寺監不許獨  
對臣僚言祖宗舊制有五日一轉對者今惟月朔行之有許朝官  
轉對者今惟待制以上與焉自明堂行視朔禮歲不過一再則是  
畢歲而論思者無幾請遇不視朔卽令具章投進以備覽觀又諸  
路監司未經上殿者雖從外移先赴闕引對方得之言並從其議  
百官相見儀制乾德二年詔曰國家職位肇分軌儀有序冀等威  
之斯辨在品式之惟明知著位之庶官及內司之諸使以至軒墀

引籍州縣命官凡進見於宰相或參候於長吏既爲總攝合異禮容稽於舊儀具無定法或傳晉天福周顯德中以廷臣內職賓從將校比其品數著爲綱條載於刑統未爲詳悉宜令尙書省集臺省官翰林祕書國子司業太常博士等詳定內外羣臣相見之儀翰林學士承旨陶穀等奏兩省官除授假使出入並參宰相起居卽以下參同舍人五品以上官遇於塗斂馬側立須其過常侍以下遇三公三師尙書令引避其值僕射斂馬側立御史大夫中丞皆分路行起居卽以下避僕射遇大夫斂馬側立中丞分路尙書丞郎卽中員外並參三師三公令僕郎中員外兼參左右丞本行尙書侍郎及本轄左右司郎中員外御史大夫以下參三師三公尙書令中丞兼參大夫知雜事參中丞三院御史兼知雜及本院之長大夫避尙書令以上遇僕射斂馬側立而避大夫遇尙書丞



郎兩省官諸司三品以上金吾大將軍統軍上將軍皆分路餘官  
遇中丞悉引避知襍兼避中丞遇左右丞斂馬側立餘皆分路郎  
中及少卿監大將軍以下皆避知襍三院同行如知襍之例少卿  
監並參本司長官丞參少卿諸司三品遇僕射於途皆引避諸衛  
大將軍參本衛大將軍東宮官參隔品凡參者若遇於途皆避公  
參之禮列拜堂上位高受參者答焉四赤縣令初見尹趨庭受拜  
後升廳如客禮內客省使謁宰相樞密使以客禮閣門使以上列  
拜皆答客省副使至通事舍人諸司使樞密承旨不答焉自樞密  
使副宣徽使皆差降其禮供奉官殿直教坊使副辭令官伎術官  
並趨庭倨受諸司副使參大使通事舍人參閣門使防禦團練刺  
史謁本道節帥節度防禦團練副使謁本使並具軍容趨庭延以  
客禮少尹幕府於院長官悉拜防禦本團練判官謁本道節帥並

趨庭上佐州縣官見宰相樞密使及本屬長官並拜於庭

天長雄武等軍使見

宰相樞密亦如之

參本府賓幕官及曹掾縣簿尉參令皆拜王府官見親王

如賓職見使長府縣官兼三館職者見大尹同赤縣令六品以下

未嘗參官見宰相樞密及本司長官並拜階上流外見流內品官

並趨庭諸司非相統攝皆稱移牒分路者不得籠街及占中道依

秩序以分左右遇於驛舍非相統攝及名位縣隔先至者居之臺

省官當通官呵止者如舊式文武官不得假借呼稱以紊朝制當

避路者若被宣召及有所捕逐許橫度焉又令諸司使副使通事

舍人見宰相樞密使升階連姓通名展拜不答拜其見樞密副使

參知政事宣徽使以客禮展拜太平興國以後又制京朝官知令

錄者見本州長吏以客禮三司判官推官主判官見本使如郎中

員外見尚書丞郎之儀咸平中又詔開封府左右軍巡使京官知

司錄及諸曹參軍到畿縣見京尹並趨庭設拜六年命翰林學士  
梁顥等詳定閣門儀制成六卷因上言三司副使序班朝服比品  
素無定列至道中筵會在知制誥後郎中前今請同諸司少卿監  
班位在上如官至給諫卿監者自如本品朝會大宴隨判使赴長  
春殿起居引駕其朝會引駕至前殿與諸司使同退大中祥符五  
年復命翰林學士李宗諤等詳定儀制文武百官遇宰相樞密使  
參知政事並避起居郎以下遇給舍以上斂馬御史大夫遇東宮  
三師尚書丞郎兩省侍郎分路而行中丞遇三師三少太常卿金  
吾上將軍並分路而行知禩御史遇尚書侍郎諸司三品金吾大  
將軍統軍諸位上將軍分路而行三院同行如知禩例不同行遇  
左右丞則避尚書丞郎中員外遇三師三公尚書令則避郎中  
員外遇丞郎則避太常博士以下朝官遇本司長官三師三公僕

射尚書丞郎大夫中丞知稜御史並避權知判者不避遇兩省給舍以上斂馬京官遇丞郎給舍大卿監祭酒以上及本寺少監卿司業並避諸軍衛大將軍以下遇上將軍統軍亦避詹事遇上臺官如卿監之例庶子少詹事至太子僕遇東宮三師三少並避遇上臺官如少卿監例中允以下遇東宮三師三少並避遇賓客詹事斂馬遇上臺官如太常博士例應合避尚書者並避三司使其權知開封府如本官品避其臺省官雖不合避而職在統臨者並避武班內職並依此品大觀二年定王嘉王府侍講沈錫等奏二王出就外學其初見及侍王禮儀講說疏數之節請如故事手詔案祥符故事記室翊善見諸王皆下拜真宗特以張士遜爲王友命王答拜以示賓禮今講讀輔翊之官職在訓道亦王友傅也可如例令王答拜羣臣赴臺參謝辭者新授加恩出使者尚書侍郎則三院御史

各一員中丞大夫皆對拜

三院仍班迎不坐班即不赴

節度使賓客太常宗正卿則

御史一員中丞大夫皆對拜兩使留後至刺史祕書監至五官正

上將軍至郎將四廂都指揮使及內職軍校遙郡以上樞密都承

旨及內職帶正員官者四赤縣令三京司錄節度行軍至團練副

使幕職官任憲御者皆御史一員對拜中丞大夫對揖

亦令揖訖進言得參風憲再揖

而若曾任中書門下及左右丞皆不赴加階勳食邑章服館閣三

司開封府職事及內職轉使額軍額亦不赴臺謝僕射過正衙日

臺官大夫以下與百官並詣幕次致賀

文官一品二品曾任中書樞密院者不赴

大夫中丞

則郎中少卿監大將軍以下亦然

本官約止則不赴僕射赴上都省者罷此儀

宋史卷一百十九

禮志第七十二

禮二十二 賓禮四

錄周後 錄先聖後

羣臣朝使宴餞

朝臣時節餽廩

外國君長來朝

契丹夏國使副見辭儀 高麗附

金國使副見辭儀

諸國朝貢

昔周滅殷封微子爲殷後俸脩其禮物作賓于王家與國咸休宋以柴周之後爲一恪又錄孔子之後亦先王崇德象賢之意也故皆爲賓禮其餘則有朝使之宴餞歲時之廩餽及外國之使聘遠方之朝貢著其迓餞宴賚之式登降揖遜之儀備一代之制焉太祖建隆元年正月四日詔曰封三王之後備三恪之賓所以示子傳孫興滅繼絕夏商之居杞宋周隋之啟介鄴古先哲王實用茲道矧予涼德歷試前朝雖周德下衰勉從於禪讓而虞賓在位

豈忘於烝嘗其封周帝爲鄭王以奉周嗣正朔服色一如舊制又  
詔曰矧惟藐躬逮事周室謳歌獄訟雖歸新造之邦廟貌園陵豈  
忘舊君之禮其周朝高慶二陵及六廟宥令有司以時差官朝拜  
祭饗永爲定式仍命周宗正卿郭玘行禮乾德六年八月詔於周  
太祖世宗陵寢側各設廟宇塑像命右贊善大夫王碩管句脩葺  
開寶六年三月周鄭王殂詔輟朝十日帝素服發哀於便殿十月  
四日葬周恭帝於順陵詔特輟四日五日朝參仁宗天聖六年錄  
故虢州防禦使柴貴子肅爲三班奉職七年錄故太子少傅柴守  
禮孫詠爲三班奉職其後又錄柴氏之後曰熙曰愈曰若拙曰上  
善竝爲三班奉職曰餘慶曰誠爲州長史助教曰貽廓等十一人  
復其身仍各賜錢一萬又錄世宗曾孫揆柔及貴曾孫日宣守禮  
曾孫若訥皆爲三班奉職嘉祐四年著作郎何鬲言昔舜受堯禹

受舜之天下而封丹朱商均以爲國賓周漢以降以及於唐莫不  
崇奉先代延及苗裔本朝受周天下而近代之盛莫如唐自梁以  
下皆不足以崇襲臣願攷求唐周之裔以備二王之後授以爵命  
封縣立廟世世承襲永爲國賓事下太常議曰古者立二王後不  
惟繼絕兼取其明德可法五代草創載祀不永文章制度一無可  
攷上取唐室世數已遠於經不合惟周則我受禪之所自義不可  
廢宜訪求子孫如孔子後衍聖公授一京官爵以公號使專奉廟  
饗歲時存問賜之粟帛牲器祭服每遇時祀竝從官給其廟宇亦  
加嚴飾如此則上不失繼絕之義度之於今亦簡而易行從之四  
月詔曰先王推紹天之序尚尊賢之義褒其後嗣賓以殊禮豈非  
聖人稽古報功之大典哉國家受命之元繼周而王雖民靈欣戴  
曆數允集而虞賓將遜德美丕顯頃者推命本始褒及支庶每遇



南郊許奏白身一名充班行恩則厚矣而義未稱將上采姚姒之舊略循周漢之典詳其世嫡優以公爵異其仕進之路申以土田之錫俾廟寢有奉饗祀不輟庶幾乎春秋通三統厚先代之制矣宜令有司取柴氏譜系於諸房中推最長一人令歲時親奉周室祀事如白身卽與京主簿如爲班行者卽比類換文資仍封崇義公與河南府鄭州合入差遣給公田十頃專管句陵廟應緣祭饗禮料所須皆從官給如至知州資序卽別與差遣卻取以次近親令襲爵授官永爲定式八月太常禮院定到內殿崇班相州兵馬都監柴詠於柴氏諸族最長詔換殿中丞封崇義公簽書奉寧軍節度判官事以奉周祀又以六廟在西京而歲時祭饗無器服之數令有司以三品服一四品服二及所當用祭器給之熙寧四年西京畱司御史臺司馬光言崇義公柴詠祭祀不以儀式周本郭

姓世宗后姪爲郭氏後今存周後則宜封郭氏子孫以奉周祀帝  
閱奏問王安石安石曰宋受天下於世宗柴氏也帝曰爲人後者  
爲之子安石曰爲人後於異姓非禮也雖受天下於郭氏豈可以  
天下之故而易其姓氏所出帝然之五年正月柴詠致仕詠長子  
早亡嫡孫夷簡當襲太常禮院言夷簡有過合以次子西頭供奉  
官若訥承襲詔以若訥爲衛尉寺丞襲封崇義公發書河南府判  
官廳公事政和八年徽宗詔曰昔我藝祖受禪于周嘉祐中擇柴  
氏旁支一名封崇義公議者謂不當封周然禪國者周而三恪之  
封不及禮益未盡除崇義公依舊外擇柴氏最長見在者以其祖  
父爲周恭帝後以其孫世世爲宣義郎監周陵廟與知縣請給以  
示繼絕之仁爲國二恪永爲定制紹興五年詔周世宗玄孫柴叔  
夏爲右承奉郎襲封崇義公奉周後二十六年叔夏升知州資序

別與差遣以子國器襲封令居衢州朝廷有大禮則入侍祠如故事其柴大有柴安宅亦各補官淳祐九年又以世宗八世孫柴彥穎特補承務郎襲封崇義公時又求隋唐及朱氏李氏石氏劉氏郭氏之後及吳越荆南湖南蜀漢諸國之子孫皆命以官使守其祀具見本紀世家

錄先聖後仁宗景祐二年詔以孔子四十六世孫北海尉宗愿爲國子監主簿襲封文宣公皇祐三年七月詔曰國朝以來世以孔氏子孫知仙源縣使奉承廟祀近歲廢而不行非所以尊先聖也宜以孔氏子孫知仙源縣事至和初太常博士祖無擇言案前史孔子後襲封者在漢魏曰褒成褒尊宗聖在晉宋曰奉聖後魏曰崇聖北齊曰恭聖後周隋竝封鄒國唐初曰褒聖開元中始追諡孔子爲文宣王又以其後爲文宣公不可以祖諡而加後嗣遂詔

有司定封宗愿衍聖公令世襲焉治平初用京東提點王綱言自  
今勿以孔氏子弟知仙源縣其襲封人如無親屬在鄉里令常任  
近便官不得去家廟熙寧中以四十八代孫若蒙爲沂州新泰縣  
主簿襲封元祐初朝議大夫孔宗翰辭司農少卿請依家世例知  
兗州以奉祀又言孔子後襲封疏爵本爲侍祠今乃兼領它官不  
在故郡請自今襲封者無兼它職終身使在鄉里朝議依所請命  
官以司其用度立學以訓其子孫襲封者專主祠事增賜田百頃  
供祭祀之餘許均贍族人其差墓戶竝如舊法賜書置教授一員  
教諭其家子弟鄉鄰或願學者聽改衍聖公爲奉聖公及刪定家  
祭冕服等制度頒賜之其後通直郎孔宗壽等舉若蒙弟若虛襲  
封仍請自今眾議擇承襲之人不必子繼庶幾畱意祖廟惇睦族  
人宣和三年詔宣議郎孔端友襲封衍聖公爲通直郎直祕閣仍

許就任關升以示崇獎端友言詔敕文宣王後與親屬一人判司  
簿尉今孔若采當承繼推恩詔補迪功郎高宗紹興二年以四十  
九代孫孔玠襲封衍聖公其後以摺以文遠以萬春以洙終宋世  
皆襲封主祀事

羣臣朝覲出使宴餞之儀太祖太宗朝藩鎮牧伯沿五代舊制入  
覲及被召使回客省齋籤賜酒食節度使十日留後七日觀察使  
五日代還節度使五日留後三日觀察一日防禦使團練使刺史  
竝賜生料節度使以私故到闕下及步軍都虞候以上出使回者  
亦賜酒食熟羊羣臣出使回朝見日面賜酒食中書樞密宣徽使  
使相竝樞密使伴三司使學士東宮三師僕射御史大夫節度使  
竝宣徽使伴兩省五品以上侍御史中丞三司副使東宮三少尙  
書丞郎卿監上將軍留後觀察防禦團練使刺史宣慶宣政昭宣

使竝客省使伴少卿監大將軍諸司使以下任發運轉運提點刑  
獄知軍州通判都監巡檢回者卽賜竝通事舍人伴客省引進四  
方館閣門使竝本廳就食羣臣賀賜衣奉慰竝特賜茶酒或賜食  
外任遣人進奉亦賜酒食或生料自十月一日後盡正月每五日  
起居百官皆賜茶酒諸軍分校三日一賜冬至二社重陽寒食樞  
密近臣禁軍大校或賜宴其第及府署中率以爲常大中祥符五  
年詔自今兩省五品尙書省四品諸司三品以上官同列出使竝  
許醪錢餞飲仍休假一日餘官有親屬僚友出行任以休務日餞  
送故事樞密節度使使相還朝咸賜宴於外苑見辭曰長春殿賜  
酒五行仍設食富直翰林龍圖閣學士以上皇親觀察使與坐八  
年四月侍衛步軍副都指揮使王能自鎮定來朝宴於長春殿閣  
門言舊制節度使掌兵無此禮例旣赴坐則殿前馬軍都校當侍

立於品秩非便遂令皆與位中興仍舊制凡宰相樞密執政使相節度外國使見辭及來朝皆賜宴內殿或都亭驛或賜茶酒竝如儀

時節餽廩大中祥符五年十一月以宰相王旦生日詔賜羊三十口酒五十壺米麩麵二十斛令諸司供帳京府具衙前樂許宴其親友旦遂會近列及丞郎給諫脩史屬官俄又賜樞密使副參知政事羊三十口酒三十壺米麩各三十斛其後以廢務非便奏罷會而賜如故又制僕射御史大夫中丞節度畱後觀察內客省使權知開封府正至寒食竝客省齋籤賜羊酒米麩立春賜春盤寒食神餼餉粥端午糴子伏日蜜沙冰重陽糕竝有酒三伏日又五日一賜水四廂及廂都指揮使中書舍人統軍防禦團練使刺史客省使樞密都承旨知銀臺司審刑院三司三司句院諸司使禁

軍校忠佐海外諸蕃進奉領刺史以上至寒食竝賜節料立春奉  
內朝者皆賜幡勝元祐二年十一月冬至詔賜御筵於呂公著私  
第遣中使賜上尊酒香藥果實縷金花等以御飲器勸酒遣教坊  
樂工給內帑錢賜之及暮賜燭傳宣令繼燭皆異恩也紹興十三  
年十二月二十三日高宗賜宰臣秦檜詔曰省所奏辭免生日賜  
宴朕聞賢聖之興必五百歲君臣之遇蓋亦千載夫以不世之英  
值難逢之會則其始生之日可不爲天下慶乎式燕樂術所以示  
慶也非喬嶽之神無以生申甫非宣王之能任賢無以致中興今  
日之事不亦臣主俱榮哉宜服異恩毋守沖節所請宜不允

宋朝之制凡外國使至及其君長來朝皆宴于內殿近臣及刺史  
正郎都虞候以上皆與太祖建隆元年八月三日宴近臣於廣政  
殿江南吳越朝貢使皆與乾德三年五月十六日宴近臣及孟昶



于大明殿開寶四年五月七日宴近臣及劉鋹子于崇德殿十一月五日江南李煜吳越錢俶各遣子弟來朝宴于崇德殿八年三月晦宴契丹使于長春殿太平興國二年二月十一日宴兩浙進奉使契丹國信使及李煜劉鋹禁軍都指揮使以上于崇德殿不舉樂酒七行而罷契丹遣使賀登極也五月十一日再宴契丹使于崇德殿酒九行而罷以其貢助山陵也三年正月十六日宴劉鋹李煜契丹使諸國蕃客于崇德殿以契丹使來賀王故也三月二十五日吳越錢俶來朝宴于長春殿親王宰相節度使劉鋹李煜皆與十月十六日宴宰相親王以令及契丹使高麗使諸州進奉使於崇德殿以乾明節罷大宴故也是後宴外國使爲常其君長來朝先遣使迎勞於候館使者朝服稱制曰奉制勞某主國主迎於門外與使者俱入升階使者執束帛稱有制國主北面再拜

稽首受幣又再拜稽首以土物饋使者再拜受國主送使者出鴻臚引詣朝堂所司奏聞通事舍人承敕宣勞再拜就館翌日遣使戒見日如儀又次日奉見于乾元殿設黃麾仗及宮縣大樂典儀設國主位於縣南道西北向又設其國諸官之位於其後所司迎引國主服其國服至明德門外通事舍人引就位侍中奏中嚴皇帝服通天冠絳紗袍出自西房卽御位典儀贊拜國主再拜稽首侍中承制降勞皆再拜稽首敕升坐又再拜稽首至坐俛伏避席侍中承制曰無下拜國主復位次引其國諸官以次入就位再拜竝如上儀侍中又承制勞還館通事舍人引國主降復位再拜稽首出其國諸官皆再拜以次出侍中奏禮畢皇帝降坐其錫宴與受諸國使表及幣皆有儀具載開寶通禮

契丹國使入聘見辭儀自景德澶淵會盟之後始有契丹國信使

副元正聖節朝見大中祥符九年有司遂定儀注前一日習儀于驛見日皇帝御崇德殿宰臣樞密使以下大班起居訖至員僚起居後館伴使副一班入就位東面立次接書匣閣門使升殿立次通事入不通喝拜兩拜奏聖躬萬福又喝兩拜隨呼萬歲喝祇候赴東西接引使副位舍人引契丹使副自外捧書匣入當殿前立天武官擡禮物分東西向入列於殿下以東爲上舍人喝天武官起居兩拜隨呼萬歲奏聖躬萬福喝各祇候閣門從東階降至契丹使位揖使跪進書匣閣門側身指笏跪接舍人受之契丹使立閣門執笏捧書匣升殿當御前進呈訖授內侍都知都知拆書以授宰臣宰臣樞密進呈訖遂擡禮物出舍人與館伴使副引契丹使副至東階下閣門使下殿揖引同升立御前至國信大使傳國主問聖體通事傳譯舍人當御前鞠躬傳奏訖揖起北使皇帝宣

閣門迴問國主北使跪奏舍人當御前鞠躬奏訖遂揖北使起卻

引降階至辭見位面西揖躬舍人當殿通北朝國信使某官某祇

候見應喏絕引當殿喝拜大起居其拜舞並依本國禮出班謝面天顏歸位喝

拜舞蹈訖又出班謝沿路驛館御筵茶藥及傳宣撫問復歸位喝

拜舞蹈訖舍人宣有敕賜窄衣一對金蹠躡子一金塗銀冠一鞞

一雨衣著三百匹銀二百兩鞍轡馬一每句應喏跪受起拜舞蹈訖喝祇

候應喏西出凡傳語并奏聖躬萬福致詞並通事傳譯舍人當殿鞠躬奏聞後同次通北朝國信副使某官某

祇候見其拜舞謝賜致詞竝如上儀西出其被賜衣一對金腰帶一雙頭靴

馬一次通事及舍人引舍利已下分班入不通使引合班贊喝大起

居拜舞如儀舍人喝有敕賜衣服束帶衣著銀器分物應喏跪授

擡擔牀跪起舞蹈拜訖喝各祇候分班引出次引差來通事以下

從人分班入不通使引合班喝兩拜奏聖躬萬福又拜隨呼萬歲

喝有敕各賜衣服腰帶衣著銀器分物應喏跪授起喝兩拜隨拜  
萬歲喝各祇候唱喏分班引出次行門殿直入起居訖殿上侍立  
文明殿樞密直學士三司使內客省使下殿舍人合班奏報閣門  
無事唱喏訖卷班西出客省閣門使以下東出其排立供奉官已  
下橫行合班宣徽使殿上喝供奉官已下各祇候分班出竝如常  
儀皇帝降坐還內宴日契丹使副以下服所賜承受引赴長春殿  
門外并侍宴臣僚宰執親王樞密使以下祇候俟長春殿諸司排  
當有備閣門使附入內都知奏班齊皇帝坐鳴鞭宰臣親王以下  
竝宰執分班舍人引入其契丹使綴親王班入舍人通某甲以下  
唱喏班首奏聖躬萬福喝各就坐兩拜隨呼萬歲喝就坐分班引  
上殿或皇帝撫問契丹使副舍人便引下殿喝兩拜隨拜萬歲喝  
各就坐次舍人通事分引舍利以下東西分班喝兩拜喝就坐分

引赴兩廊下次舍人引差來通事從人東西分班入合班喝兩拜  
隨拜萬歲喝就坐分引赴兩廊次喝教坊已下兩拜班首奏聖躬  
萬福又喝拜兩拜隨拜萬歲喝各祇候次引看盞二人稍近前喝  
拜兩拜隨拜萬歲喝上殿祇候分東西上殿立有司進茶牀內侍  
酌酒訖閣門使殿上御前鞠躬奏某甲已下進酒餘如常儀宴起  
宰臣已下降階舍人喝兩拜搢笏舞蹈喝各祇候分班出次舍利  
合班喝兩拜舞蹈三拜拜謝訖喝各祇候分引出次通事從人合  
班喝兩拜隨拜萬歲喝各祇候分班引出次喝教坊使已下兩拜  
隨拜萬歲喝各祇候如傳宣賜茶酒又喝謝茶酒拜兩拜隨拜萬  
歲喝各祇候出閣門使殿上近前側奏無事皇帝降坐鳴鞭還內  
辭日皇帝坐內殿起居班欲絕諸司排當有備催合侍宴臣僚東  
西相向班立崇德殿庭候奏班齊舍人喝拜東西班殿侍兩拜奏

聖躬萬福喝各祇候次舍人通館伴使副某甲以下常起居次通契丹使某甲常起居次通副使某甲常起居俱引赴西面立次通宰臣以下橫行通某甲以下應喏奏聖躬萬福喝各就坐應喏兩拜呼萬歲分升殿東西向立次通事舍人引契丹舍利以下次差來通事從人俱分班入當殿兩拜奏聖躬萬福喝各就坐兩拜呼萬歲分引赴兩廊立次通教坊使看盞及進茶牀酌酒并閣門奏進酒竝如長春宴日之儀酒五巡起宰臣以下降階班立兩拜搢笏舞蹈三拜喝各祇候宰臣以下并三司使文明殿學士樞密直學士升殿侍立其餘臣僚并契丹使竝出次引舍利及差來從人俱兩拜萬歲訖分班引出如傳宣賜茶酒更喝謝拜如前儀已上班絕舍人再引契丹使人西面揖躬舍人當殿通北朝國信使某祇候辭通訖引當殿兩拜出班致辭歸位又兩拜訖宣有敕賜跪

受拜舞訖喝好去遂引出次引副使致詞受賜拜舞如前儀亦出  
次引舍利已下次引差來通事從人俱分班人舍人喝有敕賜衣  
服衣著銀器分物各應喏跪受候擡擔牀絕就拜起又兩拜萬歲  
喝好去分班引出其使副各服所賜再引入當殿兩拜萬歲訖喝  
祇候引升殿當御前立皇帝宣閣門使授旨傳語國主舍人揖國  
信使跪閣門使傳旨通譯訖揖國信使起立閣門使御前搢笏於  
內侍都知處奉授書匣舍人揖國信使跪閣門使跪分付訖揖起  
下殿西出政和詳定五禮有紫宸殿大遼使朝見儀紫宸殿正旦  
宴大遼使儀紫宸殿大遼使朝辭儀崇政殿假日大遼使朝見儀  
崇政殿假日大遼使朝辭儀其紫宸殿赴宴遼使副位御坐西諸  
位上將軍之南夏使副在東朵殿竝東向北上高麗交趾使副在  
西朵殿竝東向北上遼使舍利從人各在其南夏使從人在東廊



舍利之南諸蕃使副首領高麗交趾從人谿峒衙內指揮使在西廊舍利之南又至各就位有分引兩廊班首詣御坐進酒樂作贊各賜酒羣官俱再拜就坐酒五行皆作樂賜華皇帝再坐赴宴官行謝華之禮

夏國進奉使見辭儀夏國歲以正旦聖節入貢元豐八年使來詔夏國見辭儀制依嘉祐八年見于皇儀殿門外朝辭詣垂拱殿政和新儀夏使見日侯見班絕謝班前使奉表面引入殿庭副使隨入西向立舍人揖躬舍人當殿躬奏夏國進奉使姓名以下祇候見引當殿前跪進奉表舍人受之副入內侍省官進呈使者起歸位四拜起居舍人宣有敕賜某物兼賜酒饌跪授箱過俛伏興再拜舍人曰各祇候揖西出次從人入不奏卽引當殿四拜起居舍人宣賜分物兼賜酒食跪授箱過俛伏興再拜舍人曰各祇候揖

西出辭日引使副入殿庭西向立舍人揖躬舍人當殿躬奏夏國  
進奉使姓名以下祗候辭引當殿四拜宣賜某物酒饌再拜如見  
儀凡蕃使見辭同日者先夏國次高麗次交阯次海外蕃客次諸  
蠻

高麗進奉使見辭儀見日使捧表函引入殿庭副使隨入西向立  
舍人鞠躬當殿前通高麗國進奉使姓名以下祗候見引當殿使  
稍前跪進表函俛伏興訖歸位大起居班百出班躬謝起居歸位  
再拜又出班謝面天顏沿路館券都城門外茶酒歸位再拜搢笏  
舞蹈俛伏興再拜舍人宣有敕賜某物兼賜酒食搢笏跪授箱過  
俛伏興再拜舍人曰各祗候揖西出次押物以下入不通卽引當  
殿四拜起居宣有敕賜某物兼賜酒食跪授箱過俛伏興再拜起  
居舍人曰各祗候揖西出辭日引使副入殿庭西向立舍人揖躬

舍人當殿躬通高麗進奉使姓名以下祇候辭引當殿四拜起居班首出班致詞歸位再拜舍人宣有敕賜某物兼賜酒食搢笏跪授箱過俛伏興再拜舍人曰好去揖西出次從人入辭如見政和元年詔高麗在西北二國之間自今可依熙寧十年指揮隸樞密院明年入貢詔復用熙寧例以文臣充接伴使副仍往還許上殿七年賜以籩豆各十二簋簋各四登一釧二鼎二壘洗一尊二銘曰惟雨令德孝恭世稱東蕃有來顯相子一人嘉之用錫爾寶尊以寧爾祖考子子孫孫其永保之紹興二年高麗遣使副來貢竝賜酒食于同文館

金國聘使見辭儀宣和元年金使李善慶等來遣直祕閣趙有開偕善慶等報聘已而金使復至用新羅使人禮引見宣政殿徽宗臨軒受使者書自後屢遣使來帝待之甚厚時引上殿奏事賜予

不貲禮遇竝用契丹故事紹興三年十二月宰臣進呈金使李永壽等正旦入見故事百官俱入上曰全盛之時神京會同朝廷之尊百官之富所以夸示今暫駐於此事從簡便舊日禮數豈可盡行無庸俱入使人見辭竝賜食于殿門外八年金國遣使副來就驛議和詔王倫就驛賜宴十一年十一月金國遣審議使來入見時殿陛之儀議猶未決議者謂兵衛單弱則非所以隆國體欲設仗衛恐駭虜情乃設黃麾仗千五百人于殿廊蔽以帟幙班定徹帷十二年扈從徽宗梓宮皇太后使副來十三年十一月有司言賀正旦使初至於盱眙軍賜宴未審同程合與不合筵待詔內侍省差使臣二員沿路賜御筵一員於平江府一員於鎮江府一員於盱眙軍尋詔金國賀正旦人使到闕赴宴等坐次合與宰臣相對稍南使副上下馬於執政官上下馬處三節人從竝於宮門外

上下馬立班則於西班牙與宰臣相對立仍權移西班牙使相在東壁  
宰臣之東十四年正月一日宴金國人使于紫宸殿文臣權侍郎  
已上武臣刺史已上赴坐自後正旦賜宴倣此五月金國始遣賀  
天申節使來有司言合照舊例北使賀生辰聖節使副隨宰臣紫  
宸殿上壽進壽酒畢皇帝宰臣以下同使副酒三行教坊作樂三  
節人從不赴既而三節人從有請乞隨班上壽詔許之仍賜酒食  
遇賀正使人朝辭在上幸祠官致齊之內仍用樂二十九年以皇  
太后崩其賀正使副止就驛賜宴見辭日賜茶酒並不舉樂大率  
北使至闕先遣伴使賜御筵于班荆館在古岸去府五十里酒七行翌日登舟  
至北郭稅亭茶酒畢上馬入餘杭門至都亭驛賜褥被鈔鑼等明  
日臨安府書送酒食閣門官入位具朝見儀投朝見榜子又明日  
入見伴使至南宮門外下馬北使至隔門內下馬皇帝御紫宸殿

六參官起居北使見畢退赴客省茶酒遂宴垂拱殿酒五行惟從  
官已上預坐是日賜茶器名果又明日賜生餼見之二日與伴使  
偕往天竺燒香上賜沈香乳糖齋筵酒果次至冷泉亭呼猿洞而  
歸翌日賜內中酒果風藥花餽赴守歲夜筵酒五行用傀儡正月  
朔旦朝賀禮畢上遣大臣就驛賜御筵中使傳旨宣勸酒九行三  
日客省簽賜酒食內中賜酒果遂赴浙江亭觀潮酒七行四日赴  
玉津園燕射命諸校善射者假管軍觀察使伴之上賜弓矢酒行  
樂作伴射官與大使竝射弓館伴副使竝射弩酒九行退五日大  
宴集英殿尙書郎監察御史已上皆預學士撰致語六日朝辭退  
賜襲衣金帶大銀器臨安府書送贐儀復遣執政官就驛賜宴晚  
赴解換夜筵伴使與北使皆親勸酬且以衣物爲侑次日加賜龍  
鳳茶金鍍合乘馬出北關門登舟宿赤岸又次日復遣近臣押賜

御筵自到闕朝見燕射朝辭其賜大使金千四百兩副使金八百八十兩衣各三襲金帶各三條都管上節各賜銀四十兩中下節各三十兩衣一襲塗金帶一條使人到闕筵宴凡用樂人三百人百戲軍七十人築毬軍三十二人起立毬門行人三十二人旗鼓四十人竝下臨安府差相撲一十五人於御前等子內差竝前期教習之

諸國朝貢其交州立州黎州諸國見辭竝如上儀惟迓勞宴賚之數則有殺焉其授書皆令有司付之又有西蕃唎氏西南諸蕃古城回鶻大食于闐三佛齊邛部川蠻及谿峒之屬或比間數歲入貢層檀日本大理注輦蒲甘龜茲佛泥拂菻直臘羅殿渤泥邈黎閩婆甘眉流諸國入貢或一再或三四不常至注輦三佛齊使者至以眞珠龍腦金蓮花等登陛跪散之謂之撒殿元祐二年知願

昌府韓縝言交阯小國其使人將及境臣嘗近弼難以抗禮按元豐中迺以兵官餞以通判使副詣府其犒設令兵官主之請如故事仍詔所過郡凡前宰相執政官知判者亦如之又詔立回賜于闐國信分物法歲遣貢使雖多止一加則又命于闐國使以表章至則間歲聽一入貢餘令於熙秦州貿易禮部言元豐著令西南五姓蕃每五年許一貢今西蕃秦平軍入貢期限未及詔特許之學士院言諸蕃初入貢者請令安撫鈐轄轉運等司體問其國所在遠近大小與見今入貢何國爲比保明聞奏庶待遇之禮不致失當宣和詔蕃國入貢令本路驗實保明如涉詐僞以上書詐不實論建炎三年古城國王遣使進貢適遇大禮遂加恩特授檢校少傅加食邑自後明堂郊祀竝倣此紹興二年占城國王遣使貢沈香犀象玳瑁等答以綾錦銀絹建炎四年南平王夢差廣南西



路轉運副使尹東珣充弔祭使賜絹布各五百匹羊酒寓錢寓絲  
寓金銀等就欽州授其國迎接人制贈侍中進封南越王封其子  
爲交阯郡王遇大禮竝加恩如占城國王淳熙元年賜安南國王  
印銅鑄塗以金紹興七年三佛齊國乞進章奏赴闕朝見詔許之  
令廣東經略司斟量只許四十人到闕進貢南珠象齒龍涎珊瑚  
琉璃香藥詔補保順慕化大將軍三佛齊國王給賜鞍馬衣帶銀  
器賜使人宴于懷遠驛淳熙五年再入貢計其直二萬五千緡回  
賜綾錦羅絹等物銀二千五百兩紹興三十一年正月安南獻馴  
象帝曰蠻夷貢方物乃其職但朕不欲以異獸勞遠人其令帥臣  
告諭自今不必以馴象入貢三十二年孝宗登極詔曰比年以來  
累有外國入貢太上皇帝冲謙弗受况朕涼菲又何以堪自今諸  
國有欲朝貢者令所在州軍以理論遣毋得以聞淳祐三年安南

國王陳日昷來貢加賜功臣號十一年再來貢景定三年六月日  
昷上表貢獻乞授其位於其子陳威冕咸淳元年二月加安南大  
國王陳日昷功臣增安善二字安南國王陳威冕功臣增守義二  
字各賜金帶鞍馬衣服二年復上表進貢禮物賜金五百兩賜帛  
一百匹降詔嘉獎

宋史卷一百十九終

宋史卷一百二十

禮志第七十三

禮二十三 賓禮五附錄

羣臣上表儀

宰臣赴上儀

朝省集議班位

臣僚上馬之制

臣僚呵引之制

羣臣上表儀通禮守宮設次于朝堂文東武西相對爲首設中書令位于羣臣之北禮曹掾舉表案入引中書令出就南面立禮部郎中取表授中書令令即受表入奏其禮凡正至不受朝及邦國大慶瑞上尊號請舉行大禮宰相率文武羣臣暨諸軍將校蕃夷酋長道釋耆老等詣東上閣門拜表知表官跪授表於宰臣宰臣跪授於閣門使乃由通進司奏御凡有答詔亦拜受於閣門獲可奏者奉表稱賀其正至樞密使率內班拜表長春殿門外亦閣門

使受之又西京畱守拜表儀制畱司百官每五日一上表起居質  
明竝集長壽寺立班置表于案再拜以遣其春秋賜服及大慶瑞  
竝如之或令分司官齋詣行在或止驛付南京畱司約用此制若  
巡幸東京則畱司百官亦五日一上表起居竝集大相國寺其制  
羣臣詣閣拜奏者首云文武百僚具官臣某等言常奏御者止云  
臣某言竝稱尊號已有功臣爵邑者具之狀奏者前後列銜不稱  
尊號亦云功臣爵邑其外又有書疏奏劄勅子之類乾德二年令  
有司詳定表首太常禮儀院言僕射兩省官品第二太子三師官  
品第一品位雖高而南省上臺爲尊合以僕射充首若專以品秩  
爲定則諸行侍郎品第四列於諸司三品卿監之上不可以品序  
爲準案唐貞元六年詔每有慶賀及諸臣上表竝合上公爲首如  
三公闕以令僕行之中書門下列貢章表則僕射是百僚師長難

同官僚之例詔百官集議翰林學士陶穀等曰案唐制上臺東宮  
竝是廷臣當時左右僕射侍中中書令爲正宰相貞觀末帶同中  
書門下三品者方爲宰相今僕射旣非宰相合在太子三師之下  
理固不疑若以官僚非廷臣卽宰相豈當兼領今若先二品而後  
一品升後列而退前班紊其等威事恐非順請以太子三師爲表  
首實儀等曰東宮三師爲表首論討故典實皆無據左僕射當爲  
表首者其事有六案六典尙書爲百官之本今自一品至六品常  
參官皆以尙書省官爲首則僕射合爲表首一也又唐制上表無  
上公卽尙書令僕以下行之其嗣王合隨宗正若有班位合依王  
品則嗣王雖一品不得爲表首二也僕射位次三公合爲表首三  
也況僕射爲百僚師長東宮三師非師長之任四也晉天福中詔  
謝貴上表上公行之如闕卽今僕射行之五也立制之班卑者先

入後出尊者後入先出今東宮一品立定僕射乃入僕射既退東宮一品乃出且在兩省之後六也詔從儀等議以僕射爲表首焉宰臣赴上儀開元禮有任官初上相見之儀宋制凡牧守赴上多仍州府舊禮臺省之制宰相親王使相正衙謝訖出文德殿便門至西廊堂後官兩省雜事迎參至中書便門兩省官迎班升都堂與送上官對揖見任侍中中書今同平章事者降階又與送上官對拜訖分東西升坐于牀兩省雜事讀案堂後官接案搢笏頂筆判署凡三道一司天監壽星見二開封府嘉禾合穗三澶州黃河清竝判準始謝送上官訖三司使學士兩省官待制三司使副升堂展賀百官先班中書門外上事官降階百官入直省官通班贊致賀歸後堂與參知政事樞密副使宣徽使相見會食訖退建隆三年中書門下言準唐大成元年詔故事藩鎮帶平章事合於都堂視事刊石以記官

族輸禮錢三千貫近年頗墮曩制自今藩鎮帶平章事者輸禮錢  
五百千刻石記歲月其錢以給兩省公用望舉行之詔自今宰相  
及樞密使兼平章事侍中中書令者輸禮錢三百千藩鎮五百千  
刻石以記如舊制增秩者不再輸舊相復入者輸如其數乾德二  
年置參知政事就宣徽院赴上而樞密使副止上事于本廳後以  
曹彬兼侍中爲樞密使特令赴中書上事大中祥符中詔自今宰  
相官至僕射者竝于中書都堂赴上不帶平章事亦令赴上有司  
上儀注宰相用常儀僕射本省上日郎中員外班迎于都堂門內  
尙書丞郎于東廊階上稍近班迎揖金吾將軍升階展拜賀禮生  
贊引主事讀案見任中書樞密使相前任中書門下竝不赴餘如  
宰相之儀上訖與本省御史臺四品兩省五品諸司三品以上會  
食右僕射王旦充玉清招應宮使有司案故事宰相凡有吉慶百



官皆班賀詔以未葺攸司其班賀權罷且赴上脩宮所特賜會承  
郎三司副使以上悉預自是宮觀使副上日皆賜會作樂天禧初  
太保平章事王旦爲太尉國朝以來三公不兼宰相無赴上儀特  
詔有司詳定就尙書省赴上百官班迎宰相而下悉集御史大夫  
中丞知雜三院御史皆僚屬送上判案三道中丞以上卽京府尹  
赤縣令諸曹節度刺史皇城宮苑使悉集翰林學士入院日賜設  
惟學士中書舍人赴坐又資政侍讀侍講龍圖閣學士直學士兼  
祕書監竝赴上祕閣及兩省五品以上任三館學士判館脩撰者  
皆賜設焉

朝省集議前代不載其儀宋初刑政典禮之事當集議者先下詔  
都省省吏以告當議之官悉集都堂設左右丞于堂之東北南向  
御史中丞于堂之西北南向尙書侍郎于堂東廂西向兩省侍郎

常侍給事諫舍于堂之西廂東向知名表郎官于堂之東南北向  
監議御史于堂之西南北向又設左右司郎中員外于左右丞之  
後三院御史于中丞之後郎中員外于尚書侍郎之後起居司諫  
正言于諫舍之後如有僕射御史大夫郎于左右丞中丞之前如  
更有他官卽諸司三品于侍郎之南東宮一品于尚書之前武班  
二品於諫舍之南皆重行異位卑者先就席左右丞升廳省吏抗  
聲揖羣官就坐知名表郎官以所議事授所司奉詣左右丞左右  
丞執卷讀訖授中丞中丞授于尚書侍郎以次讀訖復授知名表  
郎官將畢左右丞奉筆叩頭揖羣官以一副紙書所議事節署字  
于下授四坐監議御史命吏告云所見不同者請不署字以官高  
者爲表首如止集本省官坐如常儀其知名表郎官監議御史坐  
仍北向惟僕射以上得乘馬至都堂他官雖同平章事亦止屏外

明道二年尙書議莊獻莊懿太后升祔省官帶內外制兼三司副使承例移文不赴監議御史段少連以爲官帶近職一時之選宜有建明不當反自高異乃奏議事不集以違制論從之集賢校理趙良規言國朝政事令敕儀制別有學士知制誥待制三司副使著位視品與前朝異固無在朝敘職入省敘官之說若全不論職則後行員外郎兼學士在朝立丞郎上入省居比駕下知制誥待制入朝與待制同列入省分厠散郎員外郎任三司副使郎中任判官在三司爲參佐入本省爲正員所以舊來議事集尙書省官帶職者不赴別詔三省悉集則及大小兩省內朝官悉集則及學士待制三司副使更集他官則諸司三品武官二品各以本司長官故事尙書省官帶知制誥中書省奏班簿是干尙書省御史臺了不著籍故有絕曹之語又凡定學士舍人兩省著位除先後入

外若有升降皆特稟朝旨豈有在朝入省迭爲高下御史臺禮院  
詳定久不決判禮院馮元等曰會議之文由來非一或出朝廷別  
旨或循官司舊規故集本省者卽南省官集學士兩省臺官者容  
有兩制給舍中丞集學士臺省及諸司四品以上者容有卿監集  
文武百官者容有諸衛蓋謀事有小大集官有等差率繫詔文乃  
該餘職少連以太常易名之細考功覆議之常誤謂羣司曾當會  
席列爲具奏嬰以嚴科遂使絕曹清列還入本行分局常員略無  
異等請臣僚擬謚止集南省官屬或事緣體大臨時敕判兼召三  
省臺寺卽依舊例御史臺言今尙書省官任兩制者係臺省之籍  
無坐曹之實論職官之言正爲絕曹者設豈可受祿則繫官定奉  
議事則絕曹爲辭況王旦王化基趙安仁晁迥杜鎬楊億皆嘗預  
議於尙書省故相李昉爲主客郎中知制誥日屢經都省議事又

議大事僕射御史大夫八省唯僕射至廳下馬于今行之所以重  
本省也故都堂會議列狀以品就坐以官忽此更張恐非通理禮  
官吳育曰兩省各有未安尙書省制度雖崇亦天子之有司在朝  
廷旣殊班列入有司輒易尊卑是以朝省爲彼我官職分二事也  
兩制近職若有事議而去絕班不赴非所以求至當且知制誥中  
書省奏班簿是謂絕班翰林學士亦知制誥不絕班簿此因循之  
制非確據也縱絕班有例而絕官無聞一人命書三省連判而都  
無所繫止爲奉錢豈命官之禮今取典故中最明一事足以質定  
祥符五年僕射上事議絕班之官別頭贊引不與本省官同在迎  
班請凡會議省官帶近職者別作一行而坐自爲序別非以相壓  
若招兩制臺省諸司諸衛官畢集則各從其類自作一行書議如  
其位次詔尙書省議事應帶職官三司副使以上竝不赴如遇集

議大事令赴別設坐次是歲紫宸垂拱殿刊石爲百官表位三司使內朝班學士獨立石位門外亦班其上

熙寧二年御史臺太常禮院詳定臣僚御路上馬之制近上臣僚及北使到闕竝于御路上行馬中書樞密院執政官宣徽院御史中丞知雜御史左右金吾攝事官清道者導從呵止依舊式其三司副使以上亦許出節正任觀察使以上與合出節臣僚竝許自宣德門外至天漢橋北御路上行馬如從駕出人及宗室內庭諸宮院車騎竝不在此限御史臺又言舊制百官臺參辭謝臣僚于朝堂先赴三院御史幕次又赴中丞幕次得以體案老疾今止于御史廳一員對拜不惟有失舊儀兼恐不能公其參驗請如舊制朝堂拜揖遇放常朝卽詣御史臺已而詔宰臣親王使相兩府宣徽使遇入樞密院門許至從南第二門外上下馬又詔宰臣上馬

樞密院次之諸司又次之左右丞上下馬處竝同兩省侍郎御史臺言左丞蒲宗孟右丞王安禮賀僕射上尙書省于都堂下馬案左右丞上下馬于本廳請付有司推治安禮爭論上前以爲今日置左右丞爲執政官不應有厚薄左右丞于都堂上下馬自此始尋詔執政官退朝上馬宰臣于樞密院餘於隔門外都堂聚議退左丞于門下侍郎廳有丞于中書侍郎廳品官詣尙書省上下馬依襍歷大中大夫以上就第一貯廳監察御史以上就過道諸六曹尙書侍郎卽大中大夫以上就本廳監察御史以上就客位餘竝過道門外政和朝參臣僚上馬次序俟皇城門開樞密入次三省執政官次一品二品文臣六曹侍郎殿中監開府尹大司成侍從官兩省次百官御史臺編欄以次入其宰相罷政韓琦以司徒度判相州曾公亮以司空節度爲集禧觀使王安石以觀文殿

大學士吏部尙書知江寧府曹侁以中書令節度充景靈宮使韓絳以觀文殿大學士吏部侍郎知大名府致仕太師文彥博來朝其大朝會班位儀物如之吳育以觀文殿大學士吏部尙書爲西太一宮使大朝會綴中書門下班而已自是舊相案例重輕以特旨行之

治平四年御史臺言慶曆中有詔詳定武臣出節呵引之制節度使在尙書下三節節度觀察畱後在諸行侍郎下兩節觀察使在中書舍人下諸衛大將軍防禦團練使在大卿監下內客省使比諸司大卿景福殿使比將作監引進使比庶子在防禦使下以上各二節諸州刺史諸衛將軍在少卿監下宣慶四方館使比少卿宣政昭宣閣門使比司天監少監諸衛將軍上皇城使以下諸司使比郎中客省引進閣門副使比員外郎樞密都承旨在司天少



監下閣門使上副都承旨  
在閣門使下樞密副承旨  
諸房副承旨  
在諸司使下以上竝兩人  
呵引當時已施行矣而皇祐編敕刪去  
此制請復舉行

宋史卷一百二十一

禮志第七十四

禮二十四 軍禮

禡祭  
田獵

闕武  
打毯

受降  
擄日伐鼓

獻俘

禡師祭也宜居軍禮之首講武次之受降獻俘又次之田獵以下亦各以類附焉軍前大旗曰牙師出必祭謂之禡後魏出師又建纛頭旗上太宗征河東出京前一日遣右贊善大夫潘慎修出郊用少牢一祭蚩尤禡牙遣著作佐郎李巨源卽北郊望氣壇用香柳枝燈油乳粥酥蜜餅果祭北方天王咸平中詔太常禮院定禡儀所司除地爲壇兩壇繞以青繩張幄帟置軍牙大纛位版版方七寸厚三分祭用剛日具饌牲用太牢以羊豕代其幣長一丈八尺軍牙以白大纛以皂都部署初獻副都部署亞獻都部署三獻皆

戎服清齋一宿將校陪位禮畢焚幣擊鼓以一牢又擇日祭馬祖  
馬社

閱武仍前代制太祖太宗征伐四方親講武事故不盡用定儀亦  
不常其處鑿講武池朱明門外以習水戰復築講武臺城西楊村  
秋九月大閱與從臣登臺觀焉真宗詔有司擇地含輝門外之東  
武村爲廣場馮高爲臺臺上設屋構行宮其夜三鼓殿前侍衛馬  
步諸軍分出諸門詰旦帝乘馬從官竝戎服賜以窄袍至行宮諸  
軍陳臺前左右相向步騎交屬亙二十里諸班衛士翼從于後有  
司奏成列帝升臺東向御戎帳召從臣坐觀之殿前都指揮使王  
超執五方旗以節進退又於兩陳中起候臺相望使人執旗如臺  
上之數以相應初舉黃旗諸軍旅拜舉赤旗則騎進舉青旗則步  
進每旗動則鼓賊士譟聲震百里外皆三挑乃退次舉白旗諸軍

復再拜呼萬歲有司奏陳堅而整士勇而厲欲再舉詔止之遂舉  
黑旗以振旅軍於左者略右陳以還由臺前出西北隅軍於右者  
略左陳以還由臺前出西南隅竝凱旋以退乃召從臣宴教坊奏  
樂回御東華門閱諸軍還營鈞容奏樂於樓下復召從臣坐賜飲  
明日又賜近臣飲於中書諸軍將校飲於營中內職飲於軍器庫  
諸班衛士飲於殿門外神宗閱左藏庫副使并斌所教牌手於崇  
政殿乃命殿前步軍司擇驍健者依法教習自是營屯及更戍諸  
軍畿甸三路民兵皆隨伎藝召見親閱勇凡閱試禁衛戍軍民兵  
總率第其精拙賜以金帛而超等高者至命爲吏選官其典領者  
優加職秩涇原經略蔡挺肄習諸將軍馬點閱周悉隊伍有法入  
爲樞密副使因言於上而引試之舊以七軍營陳校試而分數不  
齊前後牴牾命校試官采掇定爲八軍法及軍法成頒行諸路旣

又定九軍法以一軍營陳卽城南好草坡閱之皆有賞賚其按閱  
礮場連弩及便坐日閱召募新軍時令習戰如故事建炎三年六  
月高宗諭輔臣曰朕欲親閱武宰臣呂頤浩曰方右武之時理當  
如此祖宗時不忘武備如鑿金明池益欲習水戰張浚曰祖宗每  
上巳游幸必命衛士馳射因而激賞亦所以講武也帝曰朕非久  
命諸將各閱所部人馬當召卿等共觀足以知諸將能否後以巡  
幸不果行紹興五年正月始御射殿閱諸班直殿前司諸軍指教  
使臣親從宿衛親兵并提轄部押親兵使臣射射共一千二百六  
十人每六十人作一撥遂詔戶部支金千兩付樞密院激賞庫充  
犒用三月御射殿閱等子趙青等五十人角力轉資支賜錢銀有  
差八月御射殿閱廣東路經畧司解發到韶州士庶子弟陳裕試  
神臂弓特補進武校尉賜紫羅窄衫銀束帶差充本路經畧司指

使十四年十一月闕殿前馬步軍將士藝精者賞有差自是歲以

冬月行之號曰冬教三十年十月御射殿引三衛統制同統制統

領同統領入內射射詔餘合赴內殿教人依年例支降例物令逐

司自行案試等第給散舊例每歲引三衛官兵教是日止引統制統領故有是詔三十二年四月二十五

日御射殿隔門特坐引呈新舊行門射射乾道二年十一月幸候

潮門外大教場次幸白石教場應從駕臣僚自祥曦殿竝戎服起

居從駕往回內管軍御帶環衛官從駕幸執以下免從就逐幕次

賜食俟進晚膳畢免奏萬福并免茶從駕還內二十四日幸候潮

門外大教場進早膳次幸白石教場閱兵三衛率將佐等導駕詣

白石皇帝登臺三衛統制統領官等起居畢舉黃旗諸軍皆三呼

萬歲拜訖三衛管軍奏報取旨馬軍上馬打圍教場舉白旗三司

馬軍首尾相接舉紅旗向臺合圍聽一金止軍馬各就圍地作圓

形排立射生官兵隨鼓聲出馬射獐兔一金止疊金射生官兵各歸陳隊舉黃旗射生官兵就御臺下獻所獲帝遂慰勞賜賚諸將鞍馬金帶以及士卒諸軍懽騰鼓舞就列百姓觀者如山時久陰曠暨帝出郊雲霧解駁風日開霽帝遣諭主管殿前司王琪等曰前日之教師律整嚴人無譁囂分合應度朕甚悅之皆卿等力也琪等曰此陛下神武之化六軍恭謹所致臣願得以此爲陛下勦絕姦宄四年十月殿前司言相視龍王堂北江岸以東茅灘一帶平地可作教場已修築將壇將來三司馬步軍並各全裝披帶衣甲執色器械至日先赴教場下營排辦俟駕登臺聽金鼓起居畢依資次變陳教閱所有聖駕出郊除禁衛外欲於本司入陳馬軍內摘差護聖馬軍八百人騎弓箭器械作十六隊於儀衛前後引從各分八隊隊各五十人往回沿路各奏隨軍鼓笛大樂及摘差

本司入教陳隊內諸軍步親隨一千人并統領將官三員至日先赴將臺下各分左右於後壁周圍畱空地三十步以容禁衛外作三重環立十六日車駕至灘上諸軍人馬前一日於教場東列幕宿營是日三衙管軍與各軍統領將佐導駕乘馬至護聖步軍大教場亭更御甲冑至灘上皇帝登臺三衙起居畢權主管殿前司王逵奏三司人馬齊舉黃旗諸軍呼拜者三逵奏請從頭教中軍鳴角到門角旗出營馬步軍簇隊成收鼓訖連三鼓馬軍上馬步人環起旗槍四鼓舉白旗中軍鼓聲旗應變方陳爲備敵之形別高一鼓步軍四向作禦敵之勢且戰且前馬軍出陳作戰鬪之勢別高一鼓各分歸地分五鼓舉黃旗變圓陳爲自環內固之形如前節次訖三鼓舉赤旗變銳陳諸軍相屬魚貫斜列前列後張爲衝敵之形亦依前節次訖王逵奏人馬教絕取旨舉青旗變放教



直陳收鼓訖一金止重鼓三馬軍下馬步人齟落旗槍皆應規矩  
帝大悅犒賞倍之士卒歡呼謝恩如儀鳴角聲簇隊訖放教拽隊  
步人分東西引拽馬軍交頭於御臺下隨隊呈試驍銳大刀武藝  
繼而進呈車礮火礮煙槍及赭山打圍射生馬步軍統制官蕭鷓  
巴以所獲獐鹿等就御臺下進獻人馬拽絕皇帝復御常服乘馬  
至車子院宣喚殿前司撥發官馬定遠侯彥昌各賜馬一匹彥昌  
仍自準備將特升副將進御酒上謂王逵曰今日教閱進止分合  
軍律整肅皆卿之力也逵奏陛下神武四海共知六師軍容孰敢  
不肅時賜酒俱以十分逵奏以軍馬事不敢飲帝曰少飲之親減  
大半飲畢謝恩退又宣問主管侍衛馬軍司李舜舉今日案閱之  
兵比向時所用之師何如舜舉奏曰今日所治之兵皆陛下平時  
躬親訓練撫以深恩賜之重賞忠勇百倍非昔日可比

其儀皇帝至祥  
曦殿行門禁衛

等並戎服迎駕常起居皇帝至知閣門官以下並戎服常起居訖皇帝乘馬出從駕官從駕至候  
湖門外大教場御幄殿下馬入幄更衣訖皇帝被金甲出幄行門禁衛等迎駕奏萬福皇帝乘馬  
至教場臺下馬升臺入幄從駕官宰執親王使相正任知閣御帶環衛官升臺於幄殿分東西相  
向立管軍並令全裝衣甲帶御器械執骨朵升臺於幄殿指南面西立俟入內官喝排立皇帝出  
幄行門禁衛等迎駕奏萬福皇帝出閣門分引殿前馬步三司統制統領官常起居訖次三司將  
佐以下聽鼓聲常起居次殿帥執骨朵赴御坐前奏教直陳俟教習畢再赴御座前奏教團陳俟  
教閱畢再赴御座前奏教銳陳俟教閱畢再赴御座前奏教團畢侍立內侍傳旨與殿前太尉  
某諸軍謝恩承旨訖轉與撥發官引三司統制統領將佐再拜謝恩訖各歸本軍皇帝起八幄更  
衣訖皇帝出幄皇帝坐舍人引宰執整後立俟進御茶床舍人贊就坐躬身應喏訖直身立  
就坐進第一盞酒起立整後俟皇帝飲酒訖舍人贊就坐躬身應喏訖直身立俟宰執酒至接盞  
飲酒訖盞付殿侍次舍人贊食並如儀至第四盞傳旨宣勸訖御樂傳旨不拜舍人承旨贊不拜  
贊就坐第五盞宣勸如第四盞儀酒食畢舉御茶床舍人分引宰執於幄殿重行立御樂傳旨不  
拜舍人承旨訖揖宰執躬身贊不拜各祇候直身立降踏道歸幕次皇帝起乘馬至車子院下馬  
皇帝出幄至車子院門樓上出賜親王酒再拜謝訖次賜使相正任并管軍知閣御帶環衛官酒  
訖逐班再拜謝訖依舊向立次親王執盞進皇帝酒皇帝飲酒訖一班再拜謝訖俟皇帝觀畢起  
降車子院門樓歸帳帳親王以下退皇帝乘馬出車子院門行門禁衛等迎駕奏萬福皇帝乘馬至  
候湖門外大教場應從駕官並戎服乘馬從駕回皇  
帝乘馬入和寧門至祥曦殿上下馬還宮餘倣此

淳熙四年十二月大閱于茅

灘十年十一月大閱于龍山十六年十月大閱于城南大教場並

如上儀慶元元年十月以在諒闇令宰執於大教場教閱二年十

月大閱于茅灘嘉泰二年十二月幸候潮門外教場大閱端平二

年四月大閱以時暑不及行

受降獻俘太祖平蜀孟昶降詔有司約前代儀制爲受降禮昶至前一日設御坐仗衛于崇元殿如元會儀至日大陳馬步諸軍于天街左右設昶及其官屬素案席褥于明德門外表案于橫街北通事舍人引昶及其官屬素服紗帽北向序立昶跪奉表授閣門使復位待命表至御前侍臣讀訖閣門使承旨出昶等俯伏通事舍人掖昶起官屬亦起宣制釋臯昶等再拜呼萬歲衣庫使導所賜襲衣冠帶陳於前昶等又再拜跪受改服乘馬至昇龍門下馬官屬至啟運門下馬就次帝常服升坐百官先入起居班立閣門使引昶等入舞蹈拜謝召昶升殿閣門使引自東階升宣撫使承旨安撫之昶至御坐前躬承問訖還位與官屬舞蹈出中書率百官稱賀遂宴近臣及昶于大明殿嶺南平劉鋹就禽詔有司撰獻

俘禮銀至上御明德門列仗衛諸軍百官常服班樓前別設獻俘  
位于東西街之南北向其將校位於獻俘位前北上西向有司率  
武士係銀等白練露布前引至太廟西南門銀等竝下馬入南神  
門北向西上立監將校官次南立俟告禮畢於西南門出乘馬押  
至太社如上儀乃押至樓南御路之西下馬立俟獻俘將校戎服  
帶刀攝侍中版奏中嚴百官班定版奏外辦帝常服御坐百官舞  
蹈起居畢通事舍人引銀就獻俘位將校等詣樓前舞蹈訖次引  
露布案詣樓前北向宣付中書門下如宣制儀通事舍人跪受露  
布轉授中書門下轉授攝兵部尚書次攝刑部尚書詣樓前跪奏  
以所獻俘付有司上召銀詰責銀伏地待臯詔誅其臣襲澄樞等  
特釋銀縛與其弟係興等臯仍賜襲衣冠帶鞞笏器幣鞍馬各服  
其服列謝樓下百官稱賀畢放仗如儀南唐平帝御明德門露布

引李煜及其子弟官屬素服待臯初有司請如獻劉鋹帝以煜奉  
正朔非若鋹拒命寢露布弗宣遣閣門使承制釋之太宗征太原  
劉繼元降帝幸城北陳兵衛張樂宴從臣於城臺繼元率官屬素  
服臺下遣閣門使宣制釋臯召繼元親勞之從臣詣行宮稱賀時  
以在軍中故不備禮繼元至京師詔告獻太廟前一日所司陳設  
如常告廟儀告曰黎明博士引太尉就位通事舍人引繼元西階  
下東向立其官屬重行立贊者贊太尉再拜訖博士引就盥爵如  
常儀詣東階解劔脫舄升第一室進奠再拜太祝跪讀祝文訖又  
再拜通事舍人引繼元及官屬詣室前西階下北向立舍人贊云  
皇帝親征收復河東僞主劉繼元及僞命官見贊者曰再拜訖退  
位次至第二第三第四第五室皆如第一室博士引太尉降階佩  
劔納履復位贊者曰再拜太尉與繼元等皆再拜退焚祝版於齋

坊繼元旣命以官故不稱俘焉元符二年西蕃王攏拶邈川首領  
瞎征等降詔具儀注以受降日御宣德門設諸班直上四軍仗衛  
諸軍素服陳列降者各服蕃服以見審問訖有旨放臯各等第賜  
首服袍帶百官稱賀而再御紫宸殿賜宴會哲宗崩樞密院畱攏  
拶等西京聽旨詔罷御樓立仗但引見于後殿攏拶一班契丹公  
主一班夏國回鶻公主次之瞎征一班邊廝波結并族屬次之應  
族屬首領各從其長以次起居僧尼公主皆蕃服蕃拜竝賜冠服  
謝訖賜酒饌橫門外政和初議禮局上受降儀皇帝乘輿升宣德  
門樓降輿坐御幄百官與降王蕃官各班樓下如大禮肆赦儀東  
上閣門以紅條袋班齊牌引升樓樓上東上閣門官附內侍承旨  
索扇扇合帝卽御坐簾卷內侍又贊扇開侍衛如常儀諸班親從  
并裏圍降王人等迎駕自贊常起居次舍人贊執儀將士常起居

次管幹降王使臣并隨行舊蕃官常起居次禮直官舍人引百官橫行北向贊者曰拜在位官皆再拜舞蹈三稱萬歲又再拜班首奏聖躬萬福又再拜退百官各就東西位舍人引降王服本國衣冠詣樓前北向女婦少西立僧又少西尼立於後入內省官詣御坐前承旨傳樓上東上閣門官承旨錄訖以紅條袋降制樓下東上閣門官承旨退降王以下俯伏東上閣門官至令通事舍人掖之起首領以下皆起鞠躬閣門宣有敕降王以下再拜僧尼止躬呼萬歲閣門錄敕旨付管幹官降王等躬聽詰問如有復奏閣門錄訖仍以紅條袋引升樓如無復奏入內省官詣御坐承旨傳樓上閣門官稱有敕放舉訖舍人贊謝恩降王以下再拜稱萬歲復序立入內省官詣御坐承旨傳樓上閣門官稱有敕各賜首服袍帶樓下閣門官承旨引所賜檐床陳于西舍人宣曰有敕降王以

下再拜鞠躬舍人稱各賜某物賜物畢又再拜稱萬歲若賜官卽  
贊謝再拜竝歸次易所賜服舍人先引降王以下至授遙郡以上  
當樓前北向東上立贊再拜稱萬歲又再拜次贊服冠帔婦女再  
拜僧尼別謝引還次贊樓上侍立官稱賀再拜禮直官舍人分引  
百官橫行北向立贊拜訖班首少前俛伏跪稱賀其詞中書隨事  
撰述賀訖復位在位者又再拜舞蹈三稱萬歲又再拜東上閣門  
官進詣樓前承旨就班首宣曰有制贊者曰拜在位官皆再拜宣  
答其詞學士院隨事撰述又贊再拜三稱萬歲又再拜樓上樞密  
院前跪奏稱某官臣某言禮畢內侍索扇扇合簾垂帝降坐內侍  
贊扇開所司承旨放仗樓下鞭鳴百官再拜退開禧三年三月四  
川宣撫副使安丙函逆臣吳曦首并違制物造法物所受金國加  
封蜀王詔及金印來獻四月三日禮部太常寺條具獻馘典故俟



逆曦首函至日臨安府差人防守殿前司差甲士二百人同大理寺官監引赴都堂審驗奏獻太廟別廟差近上宗室南班奏獻太社太稷差侍從官各前一日赴祠所致齋至日行奏獻之禮大理寺殿前司計會行禮時刻監引首函設置以俟奏獻禮畢梟於市三日付大理寺藏於庫端平元年金亾四月京湖制置司以完顏守緒函骨來上差官奏告宗廟社稷如儀

田獵太祖建隆二年始校獵于近郊先出禁軍爲圍場五坊以鷲禽細犬從帝親射走兔三從官貢馬稱賀其後多以秋冬或正月田於四郊從官或賜窄袍煥鞞親王以下射中者賜以馬太宗將北征因閱武獵近郊以多盜獵狐兔者命禁之有衛士奪人獐當死帝曰若殺之後世必謂我重獸而輕人特貰其臯帝常以臘日校獵諭從臣曰臘日出狩以順時令緩轡從禽是非荒也回幸講

武臺張樂賜羣臣飲其後獵西郊親射兔五詔以古者蒐狩以  
所獲之禽薦享宗廟而其禮久廢今可復之遂爲定式帝雅不好  
弋獵詔除有司行禮外罷近甸游畋五方所畜鷹犬竝放之諸州  
不得以鷹犬來獻已而定難軍節度使趙保忠獻鶻一號海東青  
詔還賜之臘日但命諸王略畋近郊而五坊之職廢矣眞宗復詔  
教駿所養鷹鶻量畱十餘以備諸王從時展禮禁圍草地許民耕  
牧至仁宗時言者言校獵之制所以順時令調戎事請修此禮於  
是詔樞密院奏定制獵日五鼓帝御內東門賜從官酒三行奏  
鈞容樂幸瓊林苑門賜從官食遂獵于楊村宴于幄殿奏教坊樂  
遣使以所獲馳薦太廟旣而召父老臨問賜以飲食茶絹及五坊  
軍士銀絹有差宰相賈昌朝等曰陛下暫幸近郊順時田獵取鮮  
殺而登廟俎所以昭孝德也卽高原而閱軍實所以講武事也問

耆老而秩飫所以養老也勞田夫而賜惠所以勸農也乘輿一出而四美皆具伏望宣付史館從之明年復獵于城南東韓村自玉津園去輦乘馬分騎士數千爲左右翼節以鼓旗合圍場徑十餘里部隊相應帝案轡中道親挾弓矢屢獲禽焉是時道傍居人或畜狐兔鳧雉驅場中帝謂田獵以訓武事非專所獲也悉縱之免圍內民田一歲租仍召父老勞問其後以諫者多罷獵近甸自是終靖康不復講

打毬本軍中戲太宗令有司詳定其儀三月會鞠大明殿有司除地豎木東西爲毬門高丈餘首刻金龍下施石蓮華坐加以采績左右分朋主之以承旨二人守門衛士二人持小紅旗唱籌御龍官錦繡衣持哥舒棒周衛毬場殿階下東西建日月旗教坊設龜茲部鼓樂於兩廊鼓各五又於東西毬門旗下各設鼓五閤門豫

定分朋狀取裁親王近臣節度觀察防禦團練使刺史駙馬都尉  
諸司使副使供奉官殿直悉預其兩朋官宗室節度以下服異色  
繡衣左朋黃襪右朋紫襪打毬供奉官左朋服紫繡右朋服緋繡  
烏皮鞞冠以華插脚折上巾天廡院供馴習馬并鞍勒帝乘馬出  
教坊大合涼州曲諸司使以下前導從臣奉迎既御殿羣臣謝宣  
召以次上馬馬皆結尾分朋自兩廂入序立於西廂帝乘馬當庭  
西南駐內侍發金合出朱漆毬擲殿前通事舍人奏云御朋打東  
門帝擊毬教坊作樂奏鼓毬既度颺旗鳴鈺止鼓帝回馬從臣奉  
觴上壽貢物以賀賜酒卽列拜飲畢上馬帝再擊之始命諸王大  
臣馳馬爭擊旗下搯鼓將及門逐廂急鼓毬度殺鼓三通毬門兩  
旁置繡旗二十四而設虛架於殿東西階下每朋得籌卽插一旗  
架上以識之帝得籌樂少止從官呼萬歲羣臣得籌則唱好得籌

者下馬稱謝凡三籌畢乃御殿召從臣飲又有步擊者乘驢驟擊者時令供奉者朋戲以爲樂云

救日伐鼓建隆元年司天監言日食五月朔請掩藏戈兵鎧冑事下有司有司請皇帝避正殿素服百官各守本司遣官用牲太社如故事景德四年五月朔日食上避正殿不視事至和元年四月朔日食既內降德音改元易服避正殿減膳百官詣東上閣門拜表請御正殿復常膳三表乃從至日遣官祀太社而陰雨以雷至申乃見食九分之餘百官稱賀先是皇祐初以日食三朝不受賀百官拜表嘉祐四年詔正旦日食毋拜表自十二月二十一日不御前殿減常膳宴遼使罷作樂至日仍遣官祀太社百官三表乃御正殿復膳六年六月朔日食詔禮官驗詳典故皇帝素服不御正殿毋視事百官廢務守司合朔前二日郊社令及門僕守四門

巡門監察鼓吹令率工人如方色執麾旂分置四門屋下龍蛇鼓隨設於左東門者立北整南面南門者立東整西面西門者立南整北面北門者立西整東面隊正一人執刀率衛士五人執五兵之器立鼓外矛處東戟處南斧處在西稍在北郊社令立積於壇四隅縈朱絲繩三匝又於北設黃麾龍蛇鼓一次之弓一矢四次之諸兵鼓俱靜立俟司天監告日有變工舉麾乃伐鼓祭告官行事太祝讀文其詞以責陰助陽之意司天官稱止乃罷鼓如霧晦不見卽不伐鼓自是日有食之皆如其制治平四年詔古者日食百司守職蓋所以祇天戒而備非常今獨闕之甚非王者小心寅畏之道可令中書議舉行熙寧六年四月朔日食詔易服避殿減膳如故事降天下刑釋流以下舉政和上合朔伐鼓儀有司陳設太社玉幣籩豆如儀社之四門及壇下近北各置鼓一竝植麾

旂各依其方色壇下立黃麾麾杠十尺旂八尺祭告日於時前太官令帥其屬實饌具畢光祿卿點視次引監察御史奉禮郎太祝太官令先入就位次引告官就位皆再拜次引御史奉禮郎太祝升就位太官令就酌尊所告官盥洗詣太社三上香尊幣玉再拜復位少頃引告官再盥洗執爵三祭酒奠爵俛伏興少立引太祝諸神位前跪讀祝文告官再拜退伐鼓其日時前太史官一員立壇下視日鼓吹令率工十人加色服分立鼓左右以俟太史稱日有變工齊伐鼓明復太史稱止乃罷鼓其日廢務而百司各守其職如舊儀

宋史卷二百二十二

禮志第七十五

禮二十五

凶禮一

山陵

山陵諡耐服紀葬儀與士庶之喪制爲凶禮其上陵忌日漢儀如吉祭宋制是日禁屠殺設素饌輟樂舉哭素服行事因以類附焉太祖建國號僖祖曰欽陵順祖曰康陵翼祖曰定陵宣祖曰安陵安陵在京城東南隅乾德初改卜河南府鞏縣西南四十里訾鄉鄧封村以司徒范質爲改卜安陵使學士竇儼禮儀使中丞劉溫叟儀仗使樞密直學士薛居正鹵簿使太宗時尹開封爲橋道頓遞使質尋免相以太宗兼轄五使事修奉新陵皇堂下深五十七尺高三十九尺陵臺三層正方下層每面長九十尺南神門至乳



臺乳臺至鵲臺皆九十五步乳臺高二十五尺鵲臺增四尺神牆  
高九尺五寸環四百六十步各置神門角闕有司言改卜陵寢宣  
祖合用哀冊及文班官各撰歌辭二首吉仗用大駕鹵簿凶仗用  
大升輿龍輻鵝茸纛魂車香輿銘旌哀謚冊寶車方相買道車白  
幟弩素信幡錢山輿黃白紙帳暖帳夏帳干味臺盤衣輿拂纛明  
器輿漆梓宮夷衾儀椁素翼包旌倉瓶五穀輿盜甗瓦甗辟惡車  
進玄宮有鐵帳覆梓宮籍以椶櫚褥鐵盆鐵山用然漆燈宣祖衾  
晁昭憲皇后花釵暈衣贈玉十二神當壙當野祖明祖思地軸及  
畱陵刻漏等竝制如儀有司又言案儀禮改葬總注云臣爲君子  
爲父妻爲夫也必服總者親見尸柩不可以無服總三月而除之  
又五禮精義云改葬無祖奠蓋祖奠設於柩車之前以爲行始至  
於改葬告遷而已今請皇帝服總皇親及文武官護送靈駕者亦

服總既葬而除不設祖奠止於陵所行一虞之祭宣祖謚冊謚寶  
舊藏廟室合遷置陵內改葬之禮與始葬同凡筵宜新明器壞者  
改作凡斂衣斂物竝易之其皇堂贈玉鎮圭劔佩旒冕玉寶竝以  
珉玉藥玉綬以青錦安陵中玉圭佩劔玉寶等皆用于闡王孝明  
孝惠陵內用珉王樂玉啓故安陵奉安宣祖昭憲孝惠二后梓宮  
于幄殿靈駕發引所過州府縣鎮長吏令佐素服出城奉迎并辭  
皆哭自發引至塋皇堂皆廢朝禁京城音樂順祖翼祖皆葬幽州  
至真宗始命營奉二陵遂以一品禮葬河南縣制度比安陵減五  
分之一石作減三分之一尋改上定陵名曰靖陵

開寶九年十月二十日太祖崩遺詔以日易月皇帝三日而聽政  
十三日小祥二十七日大祥諸道節度防禦團練使刺史知州等  
不得輒離任赴闕諸州軍府臨三日釋服羣臣敘班殿庭宰臣宣

制發哀畢太宗卽位號哭見羣臣羣臣稱賀復奉慰盡哀而退禮  
官言羣臣當服布斜巾四脚直領布襴腰經命婦布帕首裙帔皇  
弟皇子文武二品以上加布冠斜巾帽首經大袖裙袴竹杖士民  
縞素婦人素縵諸軍就屯營三日哭羣臣屢請聽政始御長春殿  
羣臣喪服就列帝去杖經服斜巾垂帽捲簾視事小祥改布服四  
脚直領布襴腰經布袴二品以上官亦如之大祥帝服素紗軟脚  
折上巾淺黃衫緋皮鞞黑銀帶羣臣及軍校以上皆本色慘服鐵  
帶鞞笏諸王入內服衰出則服慘又成服後群臣朝晡臨三日大  
小祥禫除朔望皆入臨奉慰內出遺留物頒賜諸臣親王遣使賚  
賜方鎮二十七日命宰臣撰陵名哀冊文明年三月十七日羣臣  
奉諡號冊寶告于南郊明日讀于靈坐前四月十日啟櫬宮帝與  
羣臣皆服如初喪朝晡臨殿中退易常服出宮城十三日發引帝

衰服啟奠哭羣臣入臨升梓宮于龍輜祖奠徹設次明德門外行  
遣奠禮讀哀冊帝哭盡哀再拜辭釋衰還宮百官辭於都城外二  
十五日掩皇堂二十九日虞主至奉安于大明殿五月十九日祔  
廟之第五室以孝明皇后王氏升配禮畢羣臣奉慰其吉凶仗如  
安陵惟增輜輓車神帛肩輿鹵簿三千五百三十九人陵在鞏縣  
祔宣祖曰永昌

至道三年三月二十九日太宗崩于萬歲殿眞宗散髮號擗奉遺  
詔卽位於殿之東楹制永熙陵皇堂深百尺方廣八十尺陵臺方  
二百五十尺大駕鹵簿用玉輅一革車五外凡用九千四百六十  
八人有司定散髮之禮皇帝皇后諸王公主縣主諸王夫人六宮  
內人竝左被髮皇太后全被髮帝服布斜止四脚大袖裙袴帽竹  
杖腰經首經直領布襪衫白綾襯服諸王皇親以下如之加布頭

冠絹襯服皇太后皇后內外命婦布裙衫帔帕頭首經絹襯服宮人無帔文武二品以上在斜巾四脚頭冠大袖襪衫裙袴腰經竹杖絹襯服自餘百官竝布幘頭襪衫腰經省五品御史臺尙書省四品諸司三品以上見前任防禦團練刺史內客省閣門入內都知押班等布頭冠幘頭大袖襪衫裙袴腰經諸軍庶民白衫紙帽婦人素縵不花釵三日哭而止山陵前朔望不視事六月詔翰林寡先帝常服及絳紗袍通天冠御容二奉帳坐列于大升輿之前仍以太宗玩好弓劍筆硯琴棋之屬蒙組繡置輿中陳於仗內十月三日靈駕發引其凶仗法物擎昇牽駕兵士力士凡用萬二千一百九十三人挽卽服白練寬衫練裙勒帛捐幘餘竝如昌陵制十一月二日有司奉神主至太廟近臣題謚號祔於第六室以懿德皇后符氏升配置衛士五百人于陵所作殿以安御容朝暮

上食四時致祭焉

乾興元年二月十九日真宗崩仁宗卽位二十日禮儀院言準禮例差官奏告天地社稷太廟諸陵應祠祭惟天地社稷五方帝諸大祠宗廟及諸中小祠竝權停俟祔廟禮畢仍舊是日命閣門使薛貽廓告哀于契丹宣慶使韓守英爲大內都巡檢內特分領宮殿門衛士屯護閤門使王遵度爲皇城四面巡檢新舊城巡檢各權添差益以禁兵器仗城門亦設器甲以辨姦詐二十一日羣臣入臨見帝于東序閤門使宣口敕曰先皇帝奄棄萬國凡在臣僚畢同號慕及中外將校竝加存撫羣臣拜舞稱萬歲復哭盡哀退是日上表請聽政凡三上始允二十三日陳先帝服玩及珠襦玉匣含襚應入梓宮之物於延慶殿召輔臣通觀明日大斂成服二十五日有司設御坐垂簾崇政殿之西廡簾幕皆縞素羣臣叙班

殿門外帝衰服杖絰侍臣扶升坐通事舍人引羣臣入殿庭西向合班俟簾捲羣臣再拜班首奏聖躬萬福隨班三呼萬歲退宰臣升殿奏事如儀三月一日小祥帝行奠釋衰服羣臣入臨退赴內東門進名奉慰自是每七日皆臨至四十九日止十三日大祥帝釋服服慘十四日司天監言山陵斬草用四月一日丙時吉十六日山陵案行使藍繼宗言據司天監定永安縣東北六里曰臥龍岡堪充山陵詔雷允恭覆案以聞皇堂之制深八十一尺方百四十尺制陵名曰永定九月十一日召輔臣赴會慶殿觀入皇堂物皆生平服御玩好之具帝與輔臣議及天書皆先帝尊道膺受靈貺殊尤之瑞屬于元聖不可留于人間宜於永定陵奉安二十三日奉道天書至長春殿帝上香再拜奉辭二十四日天書先發帝啟奠梓宮讀哀冊禮畢具吉凶儀仗百官素服赴順天門外至板

橋立班奉辭遣詣西上閤門進名奉慰十月十三日掩皇堂十八日虞主至京十九日羣臣詣會慶殿行九虞祭二十三日祔太廟第七室

嘉祐八年三月晦日仁宗崩英宗立喪服制度及修奉永昭陵竝用定陵故事發諸路卒四萬六千七百人治之宣慶使石全彬提舉制梓宮畫樣以進命務堅完毋過華飾三司請內藏錢百五十萬貫紬絹二百五十萬匹銀五十萬兩助山陵及賞賚遣使告哀遼夏及賜遺留物又遣使告諭諸路又以聽政奠告大行近臣告升遐於天地社稷宗廟宮觀又告嗣位賜兩府宗室近臣遺留物五月翰林學士王珪言天子之謚當集中書門下御史臺五品以上尙書省四品以上諸司三品以上於南郊告天議定然後連奏近制惟詞臣撰議卽降詔命庶僚不得參聞頗違稱天之義臣擬



上先帝尊諡望詔有司稽詳舊典先之郊而後下臣之議七月宰臣以下宿尚書省宗室團練使以上宿都亭驛請諡于南郊八月告于福寧殿天地宗社宮觀九月二十八日啟敢宮以初喪服日一臨易常服出十月六日靈駕發引天子啟奠梓宮升龍輜祖奠徹與皇太后步出宣德門羣臣辭于板橋十五日奉安梓宮陵側十七日開皇堂十一月二日虞主至皇太后奠于瓊林苑天子步出集英門奉迎奠于幄七日祭虞主二十九日耐太廟主如漢制不題諡號及終虞而行卒哭之祭禮院言故事大祥變除服制以三月二十九日祥至五月二十九日禫六月二十九日禫除至七月一日從吉已蒙降敕謹案禮學主肅以二十五月爲畢喪而鄭康成以二十七月通典用其說又加至二十七月終則是二十八月畢喪而二十九日始吉蓋失之也天聖中更定五服年月敕斷

以二十七月今士庶所同遵用夫三年之喪自天子達不宜有異請以三月二十九日再大祥五月擇日而爲禫六月一日而從吉於是大祥日不御前後殿開封府停決大辟及禁屠至四月五日待制觀察使以上及宗室管軍官日一奠二十八日而羣臣俱入奠二十九日禫除羣臣皆奉慰焉

治平四年正月八日英宗崩神宗卽位十一日大斂二月三日殯四月三日請諡十八日奏告及讀諡冊于福靈殿七月二十五日啟散八月八日靈駕發引二十七日葬永厚陵禮院準禮羣臣成服後乘布裏鞍韉小祥臨訖除頭冠方裙大袖大祥臨訖裹素紗軟脚幞頭慘公服乘卓鞍韉禫除訖素紗幞頭常服黑帶二日改吉服去佩魚虞主至自掩壙五虞皆在途四虞於集英殿曲赦兩京畿內鄭孟等州如故事

元豐八年三月五日神宗崩十三日大斂帝成服十七日小祥四月一日禫除七月五日請謚于南郊九月八日讀謚寶冊于福寧殿二十三日啟鼓十月一日靈駕發引二十一日葬永裕陵二十九日虞主至十一月一日虞祭于集英殿自復土大虞在途太常卿攝事三虞行禮于殿四日卒哭五日耐廟秘書正字范祖禹言先王制禮以君服同于父皆斬衰三年蓋恐爲人臣者不以父事其君此所以管乎人情也自漢以來不惟人臣無服而人君遂亦不爲三年之喪惟國朝自祖宗以來外廷雖用易月之制而宮中實行三年之喪且易月之制前世所以難改者以人君自不爲服也今羣臣易月而人主實行三年之喪故十二日而小祥而暮又小祥二十四日大祥再期而又大祥夫練祥不可以有二也旣以日爲之又以月爲之此禮之無據者再期而大祥中月而禫禫者

祭之名非服之色也今乃爲之慘服三日然後禫此禮之不經者也既除服至葬而又服之蓋不可以無服也耐廟而後卽吉財八月矣而遽純吉無所不佩此又禮之無漸也易月之制因襲已久既不可追宜令羣臣朝服正如今日而未除衰至期而服之漸除其重者再朞而又服之乃釋衰其餘則君服斯服可也至於禫不必爲之服惟未純吉以至於祥然後無所不佩則三年之制畧好古矣詔禮官詳議禮部尙書韓忠彥等議朝廷典禮時世異宜不必循古若先王之制不可盡用則當以祖宗故事爲法今言者欲令羣臣服喪三年民間禁樂如之雖過山陵不去衰服庶協古制緣先王恤典節文甚多必欲循古又非特如所言而已今既酌能盡用則當循祖宗故事及先帝遺制詔從其議神主耐廟是月冬至百官表賀崇政殿說書程頤言神宗喪未除節序變遷時思方

切恐失居喪之禮無以風化天下乞改賀爲慰不從紹聖四年大  
史請遷去永裕陵禁山民塚一千三百餘以便國音帝曰遷墓得  
無擾乎若無所害則令勿遷果不便國音當給官錢以資葬費  
元符三年正月十二日哲宗崩徽宗卽位詔山陵制度竝如元豐  
七月十一日啟敢二十日靈駕發引八月八日葬永泰陵九月九  
日以升祔畢羣臣吉服如故事太常寺言太宗皇帝上繼太祖兄  
弟相及雖行易月之制實斬衰三年以重君臣之義公除已後庶  
事相稱具載國史今皇帝嗣立哲宗實承神考之世已用開寶故  
事爲哲宗服衰重今神主已祔百官之服竝用純吉皇帝服御宜  
如太平興國二年故事禮部言太平興國中宰臣辭居正表稱公  
除以來庶事相稱獨命徹樂誠未得宜卽是公除後除不舉樂外  
釋衰從吉事理甚明今皇帝當御常服素紗展脚幘頭淡黃衫墨

犀帶請下有司裁制宰臣請從禮官議乃詔候周期服吉時詔不由門下徑付有司給事中龔原言喪制乃朝廷大事今行不由門下是廢法也臣爲君服斬衰三年古未嘗改且陛下前此議服禮官持兩可之論陛下旣察見其姦其服遂正今乃不得已從之臣竊爲陛下惜開寶時并汾未下兵革未弭祖宗櫛風沐雨之不暇其服制權宜一時非故事也原坐黜知南康軍於是詔依元降服喪三年之制其元符三年九月自小祥從吉指揮改正

紹興五年四月甲子徽宗崩于五國城七年正月問安使何蘓等還以聞宰執入見帝號慟擗踊終日不食宰臣張浚等力請始進糜粥成服于几筵殿文武百僚朝晡臨於行宮自聞喪至小祥百官朝晡臨自小祥至禫祭朝一臨太常等言舊制沿邊州軍不許舉哀緣諸大帥皆國家腹心爪牙之臣休戚一體至於將佐皆懷

忠憤宜就所屯自副將而上成服日朝晡臨故校哭於本營命徽  
猷閣待制王倫等爲奉迎梓宮使時知邵州胡寅上疏略曰三年  
之喪自天子至於庶人一也及漢孝文自執謙德用日易月至今  
行之子以便身忘其親臣以便身忘其君心知其非而不可改自  
常禮言之猶且不可況變故特異如今日者又當如何恭惟大行  
太上皇帝大行寧德皇后蒙塵北狩永訣不復實繇粘罕是有不  
其戴天之讎考之於禮讎不復則服不除寢苦枕戈無時而終所  
以然者天下雖大萬事雖眾皆無以加於父子之恩君臣之義也  
伏覩某月某日聖旨緣國朝故典以日易月臣切以爲非矣自常  
禮言之猶須大行有遺詔然後遵承今也大行詔旨不聞而陛下  
降旨行之是以日易月出陛下意也大行幽厄之中服御飲食人  
所不堪疾病粥藥必無供億崩殂之後衣衾斂藏豈得周備正掟

下兆知在何所茫茫沙漠瞻守爲誰伏惟陛下一念及此荼毒摧割備難堪忍縱未能遵春秋復讎之義俟讎殄而後除服猶當革漢景之薄喪紀以三年爲斷不然以終身不可除之服二十七日而除之是薄之中又加薄焉必非聖人之所安也又曰雖宅憂三祀而軍旅之事皆當決於聖裁則諒闇之典有不可舉蓋非枕塊無聞之日是乃枕戈有事之辰故魯侯有周公之喪而徐夷竝興東郊不開則是墨衰卽戎孔子取其誓命令六師戒嚴方將北討萬機之眾孰非軍務陛下聽斷平決得禮之變卒哭之後以墨衰臨朝合於孔子所取其可行無疑也加合聖意便乞直降詔旨云恭惟太上皇帝宣德皇后誕育眇躬大恩難報欲酬罔極百未一伸鑿輿遠征遂至大故訃音所至痛貫五情想慕慈顏杳不復見怨讐有在朕敢忘之雖軍國多虞難以諒闇然衰麻枕戈非異人



任以日易月情所不安興自朕躬致喪三年卽戎衣墨況有權制  
布告中外昭示至懷其合行典禮令有司集議來上如敢沮格是  
使朕爲人子而忘孝之道當以大不恭論其罪陛下親御翰墨自  
中降出一新四方耳目以化天下天地神明亦必有以佑助臣不  
勝大願六月張浚請謚于南郊戶部尙書章誼等言梓宮未還久  
廢謚冊之禮請依景德元年明德皇后故事行理重虞祭祔廟之  
禮及依嘉祐八年治平四年虞祭畢而後卒哭卒哭而後祔廟仍  
於小祥前卜日行之異時梓宮之至宜遵用安陵故事行改葬之  
禮更不立虞主從之九月甲子上廟號曰徽宗九年正月太常寺  
言徽宗及顯肅皇后將及大祥雖皇堂未置若不先建陵名則春  
秋二仲有妨薦獻請先上陵名宰臣秦檜等請上陵曰永固徽宗  
與顯肅初葬五國城十二年金人以梓宮來還將至帝服黃袍乘

輦詣臨平奉迎登舟易總服百官皆如之既至行在安奉于龍德別宮帝后異殿禮官請用安陵故事梓宮入境卽承之以槨有司豫備袞冕輦衣以往至則納之槨中不復改斂秦檜曰令侍從臺諫禮官集議靈駕既還當崇奉陵寢或稱欖宮禮部員外郎程敦厚希檜意獨上奏言仍欖宮之舊稱則莫能示通和之大信而用因山之正典則若忘存本之後圖臣以爲宜勿徇虛名當示大信於是議者工部尙書莫將等乃言太史稱歲中不利大葬請用明德皇后故事權欖從之以八月奉迎九月發引十月掩欖在昭慈欖宮西北五十步用地二百五十畝十三年改陵名曰永祐

紹興三十一年五月金國使至以欽宗訃聞詔朕當持斬衰三年之服以申哀慕是日文武百僚竝常服墨帶去魚詣天章閣南空地立班聽詔旨舉哭畢次赴後殿門外進名奉慰次詣几筵殿焚

香舉哭六月禮部侍郎金安節等請依典故以日易月自五月二十二日立重安奉几筵至六月十七日大神所有衰服權留以待梓宮之還從之七月宰臣陳康伯等率百官詣南郊請謚廟號欽宗遙上陵名曰永獻其餘竝如徽宗典禮

淳熙十四年十月八日高宗崩孝宗號慟擗踊踰二日不進膳尋諭宰執王淮欲不用易月之制如晉武魏孝文實行三年之喪自不妨聽政淮等奏通鑑載晉武帝雖有此意後之只是宮中深衣練冠帝曰當時羣臣不能將順其美司馬光所以譏之後來武帝竟欲行之淮曰記得亦不能行帝曰自我作古何害淮曰御殿之時人主衰絰羣臣吉服可乎帝曰自有等降乃出內批朕當衰絰三年羣臣自行易月之令其合行儀制令有司討論詔百官於以日易月之內衰服治事二十日丁亥小祥帝未改服王淮等乞俯

從禮制上流涕曰大恩難報情所未忍二十一日車駕還內帝衰  
經御輦設素仗軍民見者往往感泣詔自今五日一詣梓宮前焚  
香帝服衰服素幄引輔臣及班次而禮官奏謂苴麻三年難行於  
外庭奏入不出十一月戊戌朔禮官顏師魯尤衰等奏乞禮畢改  
服小祥之服去杖經禫祭禮畢改服素紗軟脚折上巾淡黃袍黑  
銀帶神主祔廟畢改服幘頭黑鞞犀帶遇過宮燒香則於宮中衰  
經行禮二十五月而除帝批淡黃袍改服白袍二月己亥大祥四  
日辛丑禫祭禮畢五日壬寅百官請聽政不允八日百官三上表  
引康誥被冕服出應門等語以證九日詔可十五年正月十八日  
甲寅百日帝過宮行焚香禮二十一日丁巳諭輔臣曰昨內引洪  
邁見朕已過百日猶服衰屨因奏事應以漸今宜服如古人墨衰  
之義而巾則用繪或羅朕以羅絹非是若用細布則可王淮等言

尋常士大夫丁憂過百日巾衫皆用細布出而見客則以黻布今  
陛下舉曠古不能行之禮足爲萬世法帝又曰晚間引宿直宿之  
類如何淮曰布巾布背子便是常服上不以爲然自是每御延和  
殿止服白布折上巾布衫過宮則衰絰而杖三月壬子啟櫬帝服  
初喪之服甲寅發引丙寅掩櫬甲戌親行第七虞祭大臣言虞祭  
乃吉禮合用韡袍上曰只用布折上巾黑帶布袍可也二十日丙  
戌神主耐廟是日詔曰朕昨降指揮欲衰絰三年緣羣臣屢請御  
殿易服故以布素視事內殿雖有侯過耐廟勉從所請之詔稽諸  
典禮心實未安行之終制乃爲近古宜體至意勿復有請於是大  
臣乃不敢言益三年之制斷自帝心執政近臣皆主易月之說諫  
宮謝錡禮官尤袤心知其不可而不敢盡言惟敕令所刪定官沈  
清臣再上書願堅主聽大事於內殿之旨將來耐廟畢日預降御

筆截然示以終喪之志杜絕輔臣方來之章勿令再有奏請力全  
聖孝以示百官以刑四海帝納用焉仍詔橫宮遵遺誥務從儉約  
凡修營百費竝從內庫毋侵有司經常之費諸路監司州軍府監  
止進慰表其餘禮竝免不得以進奉橫宮爲名有所貢獻上陵名  
曰永思

紹熙五年六月九日孝宗崩太皇太后有旨皇帝以疾聽在內成  
服太皇太后代皇帝行禮慶元二年六月九日大祥八月十六日  
禫祭時光宗不能執喪寧宗嗣服欲大祥畢更服兩月曰但欲禮  
制全盡不較此兩月於是監察御史胡紘言孫爲祖服已過朞矣  
議者欲更持禫兩月不知用何典禮若曰嫡孫承重則太上聖躬  
亦已康復於宮中自行二十七月之重服而陛下又行之是喪有  
二孤也自古孫爲祖服何常有此禮詔侍從臺諫給舍集議吏部

尙書葉翥等言孝宗升遐之初太上聖體違豫就宮中行三年之喪皇帝受禪正宜仿古方喪之服以爲服昨來有司失於討論今胡紘所奏引古據經別嫌明微悉爲允當欲從所請參以典故六月六日大祥禮畢皇帝及百官並純吉服七月一日皇帝御正殿饗祖廟將來禫祭令禮官檢照累朝禮例施行四月庚戌詔羣臣所議雖合禮經然於朕追慕之意有所未安早來奏知太皇太后而奉聖旨以太上皇帝雖未康愈宮中亦行三年之制宜從所議朕躬奉慈訓敢不遵依初高宗之喪孝宗爲三年服及孝宗之喪有司請於易月之外用漆紗淺黃之制蓋循紹興以前之舊朱熹初至不以爲然癸言今已往之失不及追改惟有將來啟櫬發引禮當復用初喪之服則其變除之節尙有可議望明詔禮官稽考禮律豫行指定其官志民方喪之服亦宜稍爲之制勿使肆爲

華靡其後詔中外百官皆以涼衫視事蓋用此也方朱熹上議時  
門人有疑者未有以折之後讀禮記正義喪服小記爲祖後者條  
因自識於本議之末其略云準五服年月格斬衰三年嫡孫爲祖  
謂承重者法意甚明而禮經無文但傳云父沒而爲祖後者服斬然而  
不見本經未詳何據但小記云父祖沒而爲祖母後者三年可以  
傍照至爲祖後者條下疏中所引鄭志乃有諸侯父有廢疾不任  
國致不任喪事之問而鄭答以天子諸侯之服皆斬之文方見父  
在而承國於祖服向來上此奏時無文字可檢又無朋友可問故  
大約且以禮律言之亦有疑父在不當承重者時無明白證驗但  
以禮律人情大意答之心常不安歸來稽考始見此說方得無疑  
乃知學之不講其害如此而禮經之文誠有關略不無待於後人  
向使無鄭康成則此事終未有所斷決不可直謂古經定制一字



不可增損也已而詔于永思陵下宮之西修奉欂宮上陵名曰永  
阜

慶元六年光宗崩上陵名永崇

嘉定十七年寧宗崩上陵名曰永茂

景定五年理宗崩上陵名曰永穆

咸淳十年度宗崩上陵名曰永昭自孝宗以降外庭雖用易月之  
制而宮中實行三年之喪云

宋史卷一百二十三

禮志第七十六

禮二十六

凶禮二

園陵

秀安僖王園廟

濮安懿王園廟

莊文景獻二太子橫所

上陵

忌日羣臣私忌附

皇后園陵太祖建隆二年六月二日皇太后杜氏崩于滋德殿三日百官入臨明日大斂櫬于滋福宮百姓成服中書門下文武百僚諸軍副兵馬使以上竝服布斜巾四腳直領襪衫外命婦帕頭帔裙衫九日帝見百官于紫宸門太常禮院言皇后燕國長公主高氏皇弟泰寧軍節度使光義嘉州防禦使光美竝服齊衰三年準故事合隨皇帝以日易月之制二十五日釋服二十七日禫除畢服吉心喪終制從之七月太常禮院言準詔議定皇太后諡按

唐憲宗母王太后崩有司集議以諡狀讀于太廟然後上之周宣  
懿皇后諡卽有司撰定奏聞未嘗集議制下之日亦不告郊廟修  
諡冊畢始告廟還讀于靈坐前詔從周制於是太常少卿馮吉請  
上尊諡曰明憲皇后九月六日羣臣奉冊寶告于太廟翌日上于  
滋福宮十月十六日葬安陵十一月四日神主祔太廟宣祖室乾  
德二年改卜安陵于河南府鞏縣三月二十五日奉寶冊改上尊  
諡曰昭憲皇太后讀于陵次二十六日啟故安陵二十七日靈駕  
發引命攝太尉開封尹光義遣奠讀哀冊四月九日掩皇堂

太祖孝明孝惠二后乾德元年十二月七日皇后王氏崩一十五  
日命樞密承旨王仁贍爲園陵使時議改卜安陵于鞏并以二后  
陪葬焉皇堂之制下深四十五尺上高三十尺陵臺再成四面各  
長七十五尺神牆高七尺五寸四面各長六十五步南神門至乳

臺四十五步高二丈三尺吉仗用中宮鹵簿凶仗名物悉如安陵而差減其數孝惠又減孝明焉二年三月二十七日孝明皇后啟攢宮羣臣服初喪之服明日孝惠皇后自幄殿發引皆設遺奠讀哀冊四月九日葬孝惠于安陵之西北孝明于安陵之北二十一日皆耐于別廟其後孝明升耐太祖室

太祖皇后宋氏太宗至道元年四月二十八日崩帝出次素服舉哀輟朝五日六月六日上諡曰孝章皇后以歲在未有忌權攢于趙村沙臺三年正月二十日耐葬永昌陵之北皇堂陵臺神牆乳臺鵲臺竝如孝明園陵制度仍以故許王及夫人李氏魏王夫人王氏楚王夫人馮氏皇太子亾妻莒國夫人潘氏將軍惟正亾妻裴氏陪葬二月二日耐神主于別宮莒國潘氏至道三年六月追而爲莊懷皇后陵曰保泰神主耐后廟

太宗賢妃李氏真宗至道三年十二月追尊爲皇太后諡曰元德  
祔葬永熙陵大中祥符六年升祔太宗室

太宗明德皇后李氏真宗景德元年三月十五日崩十七日羣臣  
上表請聽政凡五上始允帝去杖經服衰卽御坐哀動左右太常  
禮院言皇后宜準昭憲皇太后禮例合隨皇帝以日易月之制宗  
室雍王以下禫除畢吉服心喪終制五日詳定園陵宜在元德皇  
太后陵西安葬八月十二日上諡九月二十二日遷坐于沙臺橫  
宮十月七日祔神主太宗室二年十月十五日帝詣橫宮致奠十  
六日發引二十九日掩皇堂

真宗章穆皇后郭氏景德四年四月十五日崩皇帝七日釋服後  
改用十三日羣臣三日釋服諸道州府官吏計到日舉哀成服三  
日而除二十一日司天監詳定園陵帝令祔元德皇太后陵側但

可安厝不必寬廣其棺槨等事無得鐫刻花樣務令堅固二十五日殯于萬安宮之西階詔兩制三館秘閣各撰挽詞閏五月十三日上謚曰莊穆六月二十一日葬永熙陵之西北七月有司奉神主謁太廟祔享于昭憲皇后享畢祔別廟大中祥符二年四月十五日大祥詔特廢朝羣臣奉慰

眞宗宸妣李氏仁宗明道元年二月二十六日薨初葬洪福禪院之西北命晏殊撰墓銘二年四月六日追冊爲莊懿皇太后十月五日改葬永定陵之西北隅十七日祔神主于奉慈廟

眞宗章獻明肅皇后劉氏明道二年三月二十七日崩于寶慈殿遷坐于皇儀殿三十日宣遺誥羣臣哭臨見帝于殿之東廂奉慰宗室削杖不散髮中書樞密使相比宗室去斜巾垂帽首絰及杖翰林學士至龍圖閣直學士已上并節度使文武二品已上又去

中單及袴兩省御史臺中丞文武百官以下四腳幅巾連裳腰經  
館閣讀書翰林待詔伎術官并給孝服宰相百官朝晡臨三日內  
外命婦朝臨三日四月遣使告哀遼夏及賜遺畱物十日司天監  
詳定山陵制度皇堂深五十七尺神牆高七尺五寸四面各長六  
十五步乳臺高一丈九尺至南神門四十五步鵲臺高二丈三尺  
至乳臺四十五步詔下宮更不修蓋餘依二十七日以宰臣張士  
遜爲山園使是日翰林學士馮元請上尊謚九月四日讀于靈坐  
十月五日葬永定陵之西北隅十七日祔神主于奉慈廟

眞宗章惠皇后楊氏明道三年十一月五日保慶皇太后崩太常  
禮院言皇帝本服總麻三月皇帝皇后服皆用細布宗室皆素服  
吉帶大長公主以下亦素服竝常服入內就次易服三日而除詔  
以保祐沖人加服爲小功五日而除四年正月十六日上謚二月

六日葬永定陵之西北隅十六日升祔奉慈廟

仁宗慈聖光獻皇后曹氏神宗元豐二年十月二十日太皇太后崩于慶壽宮是日文武百官入宮宰臣王珪升西階宣遺誥已內外舉哭盡哀而出二十六日大斂命韓縝爲山陵按行使二十九日皇帝成服十一月韓縝言永昭陵北稍西地二百十步內取方六十五步可爲山陵上以迫隘縝言若增十步合徵火相主及中五之數詔增十步十二月中書言先是司天監選年月遷祔濮安懿王三夫人今大行太皇太后山陵濮三夫人亦當舉葬於是詔宗室正任防禦使以上許從靈駕已從濮安王夫人者免從三年正月十四日上諡太常禮院言大行太皇太后雖已有諡然山陵未畢俟掩皇堂去大行稱慈聖光獻太皇太后祔廟題神主仍去二太字祕閣校理何洵直言按禮既葬日中還虞于正寢蓋古者



之葬近在國城之北故可以平旦而往至日中卽虞於寢所謂葬日虞弗忍一日離也後世之葬其地旣遠則禮有不能盡如古者今大行太皇太后葬日至第六虞自當行之於外如舊儀其七虞及九虞卒哭謂宜行之於慶壽殿又按春秋公羊傳曰虞主用桑士虞禮曰桑主不文伏請罷題虞主太常言洵直所引乃士及諸侯之禮况嘉祐治平竝虞于集英殿宜如故事又嘉祐治平虞主已不書謚當依所請太常禮院又言慈聖光獻皇后祔廟前三日告天地社稷太廟皇后廟如故事至日奉神主先詣僖祖室次翼祖宣祖太祖太祖后太宗皇帝懿德皇后明德皇后同一祝次饗元德皇后慈聖光獻皇后異饌異祝行祔廟之禮次眞宗仁宗英宗室禮畢奉神主歸仁宗室如此則古者祔謁之禮及近代徧饗故事竝行不廢從之三月十日葬永昭陵二十二日祔于太廟

英宗宣仁聖烈皇后高氏哲宗元祐八年九月三日崩于崇慶宮  
遺詔皇帝成服三日內聽政羣臣十三日諸州長吏以下三日而  
除釋服之後勿禁作樂園陵制度務遵儉省餘竝如章獻明肅皇  
太后故事十四日詔園陵依慈聖光獻太皇太后之制紹聖元年  
正月二十八日禮部言將題神主謹按章獻明肅皇后神主書姓  
劉氏詔依故事四月一日葬永厚陵

神宗欽聖憲肅皇后向氏建中靖國元年正月十三日崩二月太  
常寺言大行皇太后山陵一行法物宜依元豐二年慈聖光獻皇  
后故事皇堂之制下深六十九尺面方二丈五尺石地穴深一丈  
上高二丈一尺鵲臺二各高四丈一尺乳臺二各高二丈七尺神  
牆高一丈三尺五月六日葬永裕陵二十六日祔于神宗廟室先  
是元祐四年美人陳氏夢贈充儀又贈貴儀徽宗入繼大統詔有

司議追崇之典上尊諡曰欽慈皇后祔葬永裕陵與欽聖同祔神  
宗室崇寧元年二月聖瑞皇太妃朱氏夢制追尊爲皇太后遂上  
尊諡曰欽成皇后五月祔葬永裕陵祔神主於神宗室皆備禮如  
故事

哲宗皇后劉氏政和三年二月九日崩詔崇恩太后合行禮儀可  
依欽成皇后及開寶皇后故事參酌裁定閏四月上諡曰昭懷皇  
后五月葬永泰陵祔神主於哲宗廟室徽宗皇后王氏大觀二年  
九月二十六日崩尚書省言章穆皇后故事眞宗服七日從之十  
月太史局言大行皇后園陵斬草用十月二十四日斥土用十一  
月十三日葬用十二月二十七日諸宗室合祔葬者竝依大行皇  
后月日時刻十一月宰臣蔡京等請上諡曰靖和皇后十二月奉  
安梓宮于永裕陵之下宮神主祔別廟四年十二月改諡曰惠恭

其後高宗復改曰顯恭

哲宗昭慈聖獻皇后孟氏紹興元年四月崩詔以繼體之重當承重服以遺誥擇近地權殯俟息兵歸葬園陵梓取周身勿拘舊制以爲它日遷奉之便六月殯于會稽上亭鄉橫宮方百步下宮深一丈五尺明器止用鉛錫置都監巡檢一員衛卒百人生日忌辰且望節序排辦如天章閣儀虞主還州行祔廟禮

徽宗顯仁皇后章氏紹興二十九年崩祔于永祐陵橫宮

高宗憲聖慈烈皇后吳氏慶元三年崩時光宗以太上皇承重靈宗降服齊衰其四年三月甲子權櫬于永思陵

孝宗成肅皇后夏氏開禧三年崩殯于永阜陵正北吏部尚書陸峻言伏覩列聖在御間有諸后上仙緣無山陵可祔是致別葬若上仙在山陵已卜之後無有不從葬者其它諸后葬在山陵之前

神靈既安竝不遷耐惟元德章懿二后方其葬時名位未正續行追冊其成穆皇后孝宗登極卽行追冊改殯所爲橫宮典禮已備與元德章懿事體不同所以更不遷耐竊稽前件典禮祗緣喪有前後勢所當然其於禮意卻無隆殺今來從葬阜陵爲合典故從之

寧宗恭聖仁烈皇后楊氏紹定五年十二月崩耐葬茂陵

濮安懿王園廟治平三年詔置園令一人以大使臣爲之募兵二百人以奉園爲額置柏子戶五十人廟三間二厦神門屋二所及齋院神廚靈星門其告祭濮安懿王及諸神祝文竝本宮教授撰河南府給香幣酒脯禮物太祝奉禮則命永安縣尉主簿攝如闕官以本府曹官凡祭告及四仲饗竝依此制奉安神主三獻命西京差判官一員亞獻朝臣一員終獻攝知園令出納神主廟制用

一品夫人任氏憤感亦稱爲園元豐詔曰濮安懿王先帝斟酌典禮卽園立廟詔王子孫歲時奉祀義協恩稱後世無得議焉今三夫人名位或未正塋域或異處有司置而不講曷足以彰明先帝甚盛之德仰承在天之志乎三夫人可竝稱曰王夫人命主司擇歲月遷祔濮園俾其子孫以時奉主與王合食而致孝思焉禮官奏請王夫人遷葬給鹵簿全仗用鼓吹至國門外減半喪行與四時告享竝令嗣濮王主之南渡後主奉祠事以嗣濮王爲之園令一員以宗室爲之祠堂主管兼園廟香火官一員以武臣爲之紹興二年九月詔每歲給降福建度牒一十道充祠堂仲饗忌祭五年二月嗣濮王仲湜言被旨迎奉濮安懿王神主至行在今已至紹興府欲權就本處奉安從之先是神主神貌在盧州嗣濮王士從乞奉遷於穩便州郡安奉故也十三年五月知大宗正事權主

奉濮安懿王祠堂士奏言濮安懿王祠貌神主權於紹興府光孝寺仲享薦祭其獻官牲牢料禮竝多簡略乞令有司討論舊制行下禮部太常寺令參酌欲令士奏攝初獻仍差士奏子或從子二人攝亞終獻其合用牲牢豕各一邁豆各十設禮料初獻合服八旒冕亞獻終獻合服四旒冕奉禮郎太祝太官令服無旒冕竝以舊制從事從之二十六年二月嗣濮王士儉言濮安懿王祠堂外無門牖內闕龕帳別無供具望下紹興府置造修奉淳熙五年曰月詔濮安懿王祠堂園廟自今實及三年令木堂牒紹興府檢計修葺從嗣濮王士鞞請也

秀安僖王園廟紹熙元年三月詔秀王襲封等典禮禮部太常寺乞依濮安懿王典禮避秀安僖王名一字詔恭依仍置園廟四月詔皇伯滎陽郡王伯圭除太保依前安德軍節度使充萬壽觀使

嗣秀王以奉王祀六月禮部太常寺言濮安懿王園廟制度廟堂  
神門宜竝用獸所安木主石埒于室中西壁三分之一近南去地  
四尺開埒室以石爲之其中可容神主跌匱今來秀安僖王及夫  
人神主欲乞竝依上件典禮四仲饗廟三獻官并奉禮郎等係嗣  
秀王充初獻本位姪男攝亞終獻其奉禮郎等乞湖州差官充攝  
行禮合用牲牢羊豕湖州排辦祭器祭服工部下文思院製造每  
遇仲饗本府前期牒報湖州排辦所有行禮儀注乞從太常寺參  
照濮安懿王儀注修定竝從之其園廟差御帶霍漢臣同湖州通  
判一員相度聞奏八月霍漢臣暨通判湖州朱悛言奉詔相度園  
廟以圖來上十月詔委通判一員提督修造祠堂如法修蓋十一  
月禮工部太常寺言濮安懿王園廟三間二厦神門屋二坐齋院  
神廚靈星門欲令湖州照應建造從之三年正月一日嗣秀王伯



圭奏建造秀安僖王園廟近已畢工所有修製神主儀式令所司  
檢照典故修制委官題寫詔差權禮部尚書李燾題寫二月伯圭  
又奏秀安僖王祠堂園廟乞從濮安懿王制每三年一次從本所  
移牒所屬州府檢計修造從之

莊文太子喪禮乾道三年七月九日皇太子薨設素幄于大子宮  
正廳之東皇帝自內常服至幄俟時至易服阜幙頭白羅衫黑銀  
帶絲鞋就幄發哀是日皇后服素詣宮隨時發哀如宮中之禮合  
赴陪位官竝常服吉帶入麗正門詣宮幕次俟時至常服黑帶立  
班俟發哀畢易吉服退自發哀至釋服日皇帝不視事權禁行在  
音樂仍命諸寺院聲鐘其小斂大斂合祭告以本宮主管春坊官  
一員行禮其餘祭告以諸司官行禮差護喪葬事一員左臧庫出  
錢二萬貫銀五千兩絹五千匹成服日皇帝服期次麤布幙頭襪

衫腰經絹襯衫白羅鞵以日易月十三日而除皇后服次麤布蓋  
首長衫裙帔絹襯服白羅鞵六宮人不從服皇太子妃及本宮人  
竝斬衰三年文武百官成服一日而除其文武合赴官及御史臺  
閣門太常寺引班祇應人竝服布幘頭襴衫腰繫布帶本宮官僚  
竝服齊衰三日服臨七日而除釋衰服後藏其服至葬日服葬畢  
而除十二日詔故皇太子櫨所就安穆皇后櫨宮側近擇地繼而  
都大主管所言太史局官等選到寶林院法堂堪充皇太子櫨所  
從之十三日以皇太子薨告天地宗廟社稷宮觀十八日賜諡莊  
文閏七月一日遣攝中書令尚書右僕射魏杞奉諡冊寶于皇太  
子靈柩前百官常服入次易黑帶行禮畢常服赴後殿門外進名  
奉慰是夕皇帝詣東宮行燒香之禮如宮中之儀二日出葬宰臣  
葉顥等詣靈柩前行燒香之禮興靈訖行事官陪位親王南班宗

室東宮官僚入班廳下再拜宰臣升詣香案前上香酌茶奠酒訖  
舉冊官舉哀冊讀冊官跪讀訖宰臣再拜各降階立在位官皆  
再拜靈柩進行文武百僚奉辭于城外親王宗室竝騎從至葬所  
掩壙畢辭訖退是日百僚進名奉慰四年五月禮部太常寺言國  
朝典故卽無皇太子小祥典禮今參酌討論將來莊文太子小祥  
日乞皇帝前後殿特不視事其日先命侍從官一員常服詣太子  
神坐前行奠醑禮令本宮官僚常服陪位奠醑畢退次慶王恭王  
常服赴神坐前奠醑畢退次太子妃并榮國公以下行人禮至  
大祥日太子妃榮國公以下及本宮人行禮畢焚燒神帛衰服間  
月妃及榮國公行禫祭家人禮從之明年七月九日大祥是日皇  
帝不親事差簽書樞密院事梁克家詣太子宮行奠醑禮如前儀  
景獻太子嘉定十三年八月六日薨其發哀制服竝如莊文太子

之禮九日詔護喪視殯所于莊文太子櫬宮之東竝依其制建造  
九月十日賜諡景獻遣攝中書令知樞密院事鄭昭先奉諡冊寶  
于皇太子靈柩前讀冊讀寶如儀訖班退至興靈日宰臣詣皇太  
子柩前行禮畢柩行其宗室便相南班官常服黑帶竝赴陪位騎  
從至葬所俟掩攢畢奉辭訖退其日皇帝不視事百司赴後殿門  
外立班進名奉慰十四年七月二日小祥差知樞密院事鄭昭先  
充奠醑官十五年八月六日大祥九月十五日詔景獻太子几筵  
已徹高平郡夫人傅氏可特封信國夫人仍令主奉祭祀

上陵之禮古者無墓祭秦漢以降始有其儀至唐復有清明設祭  
朔望時節之祀進食薦衣之式五代諸陵遠者令本州長吏朝拜  
近者遣太常宗正卿或因行過親謁宋初春秋命宗正卿朝拜安  
陵以太牢春祠乾德三年始令宮人詣陵上冬服歲以爲常開寶

九年太祖幸西京過鞏縣謁安陵奠獻雍熙二年宗正少卿趙安  
易言昨朝拜安陵永昌陵有司止設酒脯香以未明行事不設燭  
燎又先赴永昌陵後赴安陵及帝后二位不徧拜頗愆於禮事下  
有司議曰按開元禮春秋二仲月司徒司空巡陵不設牲牢之祀  
今請如宗廟薦享少加裁減除不設登鉶牙槃食及太常登歌外  
餘悉如大祠朝拜日有司豫于陵南百步道東設次具翦除器以  
備酒掃設宗正卿位于兆外之左西向陵官位於卿之東南執事  
官又於其南俱西向北上設祭器禮料酒饌于兆門內宗正卿以  
下各就位再拜盥手奠酒讀祝冊再拜先赴安陵次永昌陵次孝  
明孝惠懿德淑德皇后陵從之景德三年眞宗將朝諸陵以宰臣  
王旦爲朝拜諸陵大禮使太常禮院言朝陵故事合排小駕鹵簿  
唐太宗朝獻陵宿設黃麾仗周衛陵寢今請周設黃麾仗又唐制

前一日陵令以玉冊進御親書近臣奉出陵令受之今請造竹冊  
四幅祝畢焚之其百官位舊設陵所從祝官及皇親客使分於神  
道左右貞觀中竝陪列司馬門內今望準舊儀施行又舊儀詣寢  
宮至大次之時設百官位奏請行禮望令先入赴寢殿立班貞觀  
中皇帝至小次素服乘馬檢會今年正月車駕朝拜明德櫝宮止  
服素白衣當時皇帝在大祥之內今旣服除望止服淡黃袍又按  
貞觀永徽故事朝陵皆先親後尊拜辭訖出還大次便進發今望  
先朝永熙陵行事及辭皇帝皆兩次再拜陪位官每陵亦各兩次  
再拜今請皇帝詣安陵參辭四度再拜永昌永熙陵各兩度設拜  
舊儀逐寢殿上食備太牢之饌珍羞庶品近以羊豕代太牢今請  
備少牢之祭設奠讀冊畢復詣寢宮上珍羞庶品別行致奠之禮  
又舊儀前發二日太尉告太廟今請依禮徧告六室詔特服素白

衣行事次序如告太廟餘依所請四年正月車駕次鞏縣罷鳴鞭  
及太常奏嚴金吾傳呼既至齋于永安鎮行宮太官進蔬膳是夜  
漏未盡三鼓帝乘馬卻輿輦繖扇至安陵素服步入司馬門行奠  
獻禮諸陵亦然又詣下宮凡上宮用牲牢祝冊有司奉事下宮備  
膳羞內臣執事百官陪位又詣元德太后陵奠獻別于陵西南設  
幄殿祭如下宮禮畢徧詣孝明孝惠孝章懿德淑德明德莊懷七  
后陵遂單騎從內臣巡視陵闕而親奠奠魏岐鄆安周六王及恭  
孝太子諸墳其三陵陪葬皇子皇孫公主之未出閣者及諸王夫  
人之蚤亾者各設位次諸陵下宮之東序安陵百二十一墳量設  
三十位男子女子共祝版二昌陵十五墳量設十位熙陵八墳量  
設五位竝祝版一以致祭焉辰後暫詣輶次更衣復詣諸陵奉辭  
有司以朝拜無辭禮帝不忍故復往仍遣官祭一品皇親諸親墓

大中祥符四年正月祀汾陰經鞏縣有司請于訾村王臺設幄殿  
置三陵神坐皇帝鞞袍就幄設香酒時果牙槃食奠獻而命大臣  
以香幣酒脯詣諸陵致告駕還復行親謁之禮帝素服乘馬至永  
安縣齋于行宮夜漏未盡二鼓詣三陵及元德太后明德皇后陵  
奠獻哀慟未明禮畢復詣四陵奉辭省視几筵奠獻如初禮又徧  
詣諸后陵諸王墳致奠命使徧祭皇親諸親墳及汝州秦王墳  
是歲命禮官定春秋二仲遣官朝陵儀注以祭服行事專差宗正  
卿一員朝拜三陵別遣官二員分拜諸陵又製長竿檐床二副置  
陵表祝版遣寬衣軍士三十二人輿送陵下其後添差陵廟行禮  
官四員選朝官京官宗姓者充翰林學士錢惟演言春秋朝陵載  
于舊式公卿親往蓋表至恭唐顯慶中始詔三公行事天寶以後  
亦遣公卿巡謁蓋取朝廷大臣不必須同國姓後參用太常宗正



卿晉開運中亦命吏部侍郎近年以來止遣宗正等官人輕位卑  
實虧舊制望自今于丞郎諸司三品內遣官闕則差兩省諫舍以  
上所冀仰副追孝之心以成稽古之美景祐初滄州觀察使守節  
言寒食節例遣宗室拜陵而十月令內司賓往非所以致恭乃詔  
宗室正刺史以上一員朝拜四年減柏子戶安陵永昌永熙各畱  
四十戶永定五十戶會聖宮十戶慶曆二年寒食十月朔宗室刺  
使以上聽更往朝陵皇祐三年太常博士李壽朋奏帝后諸陵薦  
饗皆有時獨昭憲皇后以合葬安陵不及時祭禮院言朝拜儀注  
牲牢竝如太廟常饗例諸陵止奠一爵而安陵奠兩爵兩贊再拜  
惟祭饌不兼設蓋有司相承失之於是詔安陵昭憲皇后祝版牲  
幣御封香依太廟同室禮更造諸陵祭器貯別庫三陵皆置卒五  
百人唯定陵以章獻太后故別置一指揮昭陵使甘昭吉引定陵

例請置守陵奉先兩指揮京西轉運司請減定陵卒半以奉昭陵  
詔選舉一指揮額五百人初永安縣官月朔朝定陵望朝三陵韓  
琦言昭陵未有朝日乃令縣官朔望分朝諸陵熙寧中詔文臣大  
兩省武臣閣門使以上經過陵下竝許朝拜又詔自今臣僚朝拜  
諸陵除見任嘗任執政官許進湯餘止奠獻薦新不特拜初故事  
車駕詣陵謂之親謁南渡之後此禮不舉故上陵或曰省視或曰  
保護或曰薦獻或曰祭告或曰致祭或曰望祭或曰修奉悉遺官  
不專於行禮也建炎元年五月一日詔應永安軍祖宗陵寢可差  
西京畱守及臺臣一員躬親省視如有合修奉去處措置奏聞仍  
詔廊延路副總管劉光世充省視陵寢使又詔河南府鎮撫使翟  
興團結本處義兵保護祖宗陵寢四年六月詔令禮部給降度牒  
一百道充祭告諸陵禮料仍令翟興所差來人齋祭告表以行紹

興元年九月起居郎陳興義言陛下躬履艱難之運駐驛東南列  
聖陵邑遠在洛師顧瞻山川未得時省雖欲遣使道路不通聖懷  
日憤近聞道路少通差易前日願詔執事每半年擇遣使臣兩員  
往省諸陵詔令樞密院每半年差使臣兩員前去三年正月禮部  
太常寺言春秋二仲薦獻諸陵乞于行在法惠寺設位望祭行禮  
從之自是每歲薦獻率循此制五月詔令戶部支金一百兩付河  
南府鎮撫使司幹辦公事任直清充祭告永安軍諸陵九年正月  
上謂輔臣曰祖宗陵寢久淪異域今金國旣割還故地便當遣宗  
室使相與臣寮前去修奉洒掃尋命同判太宗正事士瓊兵部侍  
郎張燾前去河南府祇謁修奉六月太常丞梁仲敏等言春秋二  
仲遣宗室遙郡防禦使薦獻諸陵太常少卿薦獻永祐陵權宜于  
行在設位行禮今道路旣通望依舊遣官前詣詔令西京畱守司

候仲秋就便選官前詣諸陵薦獻土褒張燾回言諸陵下石澗水自兵興以來涸竭幾十五年二使到日水卽大至父老驚嘆以爲中興之祥十年三月禮部言池州銅陵縣丞呂和問進宮陵儀制望付太常寺以備檢照永安軍等處今已收復遂委知軍詣諸陵逐位檢視除永定永昭永厚永裕永泰陵園廟竝無損動內永安永昌永熙陵神臺壘裂未敢一面擅行補飾太常寺看詳若行補修合就差所委修飾官奏告行禮詔令河南府委官如法補飾不得滅裂其後兵部侍郎兼史館修撰張燾言伏見宣諭官方庭實有請乞將來先帝山陵一依永安陵等制度臣區區愚忠願明詔有司異時永固陵几金玉珍寶盡斥不用播告天下咸使聞知如是自然可保無虞上嘉納之三十二年六月詔祖宗陵寢令本處招討使同本處官吏躬親朝謁如法修奉務在嚴潔以稱孝思之

意乾道六年八月詔承信郎劉湛特轉兩官右迪功郎劉師顏特與右承務郎升擢差遣秦世輔特轉一官升充正將以湛等歸正結義保護陵寢故也端平元年正月京西湖北安撫制置使史嵩之露布以滅金聞二月御筆國家南渡以後八陵迴隔常切痛心今京湖帥臣以圖來上恭覽再三悲喜交集凡在臣子諒同此情可令卿監郎官以上詣尚書省恭胝集議遂遣太常寺主簿朱揚祖國門祇候林拓朝謁八陵紹興元年六月太常寺言昭慈獻烈皇太后櫬宮在越州會稽縣合依四孟朝獻禮例差宰執一員前一日赴櫬宮泰寧寺宿齋至日行朝拜之禮詔同知樞密院事李回行禮二年三月知紹興府張守言昭慈獻烈皇后櫬宮近在府界望許臣以時朝謁從之自是守臣皆許朝謁十七年十一月殿中侍御史余堯弼言望舉行舊制於春秋二仲遣官詣永祐陵櫬

宮薦獻臣僚又言陵廟之祭日已有薦新著在令典方今宗廟久已遵奉惟是永祐陵闕而未講望令有司討論舉而行之太常寺討論欲依政和五禮依典故令兩橫宮遵依每月檢舉差官行禮其新物令逐宮預行關報紹興府排辦從之二十七年六月詔永祐陵及昭慈聖獻皇后橫宮檢察承受以檢察宮陵所爲名三十年九月吏部言紹興府會稽知縣依倣陵臺令典故於階衙內帶兼主管橫宮事務量加優異淳熙元年正月禮部太常寺言春秋二仲差太常少卿薦獻永祐陵橫宮并周視陵域如遇少卿有關乞從本寺前期取指揮差本寺以次官充攝所有今年仲春薦獻卽日見闕少卿詔差太常丞錢良臣自後春秋遇少卿闕率以爲例慶元元年六月詔永阜陵孝宗皇帝橫宮每歲秋季一就令所差監察御史恭詣朝拜檢察從御史臺申請諸陵亦如之

忌日唐初始著罷樂廢務及行香修齋之文其後又朔望停朝令天下上州皆準式行香天祐初始令百官詣閣奉慰宋循其制惟宣祖昭憲皇后爲大忌前一日不坐羣臣詣西上閣門奉慰移班奉慰皇太后退赴佛寺行香凡大忌中書悉集小忌差官一員赴寺如車駕巡幸道遇忌日皆不進名奉慰畱守自於寺院行香仍不得在拜表之所天下州府軍監亦如之建隆二年宣祖忌日時明憲太后在殯羣臣止詣閣奉慰而罷行香乾德二年禘于太廟其日惠明皇后忌有司言唐開成四年正月二十二日祀先農與穆宗忌同日太和七年十二月八日蜡百神與敬宗忌同日詔以近廟忌辰作樂非便宜令縣而不作竊以農蜡之祭猶避廟忌而不作樂況僖祖同廟連室而在諱辰詎可輒陳金石之奏伏望依禮縣而不作其後宣祖昭憲忌日詔準太祖太宗奉翼祖禮前一

日更不廢務咸平中有司將設春宴金明池習水戲開瓊林苑縱  
都人游賞帝以是月太宗忌月命詳定故事以聞史館檢討杜鎬  
等言按晉穆帝納后月是康帝忌月禮官荀詡議有忌月無忌月  
若有忌月卽有忌時忌歲益無所据當時從詡所議唐武后神功  
元年建安王攸宜破契丹詣闕獻捷軍人入城例有軍樂內史王  
及善以國家忌月請備而不奏鳳閣侍郎王方慶奏按禮經有忌  
日而無忌月遂舉樂憲宗時太常博士韋公肅言禮無忌月禁樂  
今太常教坊以正月爲忌月停郊廟饗宴之禮中外士庶咸罷宴  
樂竊恐乖宜時依公肅所奏伏以忌日不樂嘗載禮經忌月徹縣  
實無典故況前代鴻儒議論足据其春宴及池苑竝合舉樂景德  
元年北征凱旋京師是日以懿德皇后忌詔徹鹵簿鼓吹禮官議  
曰班師振旅國之大事后之忌日家之私事今大駕凱旋軍容宜



肅昔武王伐紂在諒闇中猶前歌後舞夫諒闇是重遠忌是輕以此而論人不無爽況春秋之義不以家事辭王事其還京日法駕鼓吹音樂竝請振作尋詔自今宗廟忌日西京及諸節鎮給錢十千防禦團練州七千軍事州五千以備齋設元德皇后忌日舊制樞密使依內諸司例惟進名不赴行香知樞密院王欽若以爲言自是三司使副翰林樞密龍圖直學士竝赴焉真宗崩元德明德皇后忌日在禫制內乃停進名行香凡奉慰宰相樞密使各帥百官內職其進名節度使畱後觀察使各進名忌日前後各禁刑三日如天慶節釋杖以下情輕者復斷屠宰不視事前後各三日禁樂各五日其後以歲月漸遠禁刑不視事各二日禁樂各三日章憲明肅太后忌辰禮官請依章懿太后禮例前後二日不視事一日禁屠宰各三日禁樂詔應大忌日行香臣僚竝素食復立孝惠

孝章淑德章懷章惠溫成諸后爲小忌未幾罷神宗卽位太常院言僖祖及文懿皇后神主旣祧準禮不諱忌日亦請依唐睿宗祧遷故事廢之初神御殿酌獻設皇帝位于庭下而忌日兩府列于殿上寺院行香左右巡使兩赤縣令于中門相向分立俟宰臣至立位前直省官贊通揖于禮無據乃命行香羣臣班殿下宰相一員升殿跪爐而罷通揖又詔大忌日不爲假執政官蚤出禮部言順祖及惠明皇后旣葬遷主罷行香忌日請于永昌院佛殿之東張幄齋薦乃詔僖祖翼祖并六位忌日咸如之先是翼祖簡穆皇后神主奉藏夾室依禮不忌後復詔還本室而忌日亦如舊焉政和新儀羣臣進名奉慰其日質明文武朝參官入詎朝堂就次御史臺先引殿中侍御史一員入就位次西上閤門御史臺分引朝參官及諸軍將校次禮直官引三公以下在西上閤門南階下

每等重行異位竝北向東上知西上閣門官于班前西向立搢笏  
執名紙躬三公以下文武百寮俱再拜俟閣門官執笏置名紙笏  
上入西上閣門訖退羣臣奉慰詣景靈宮每等重行異位竝北向  
東上禮直官揖班首以下再拜訖引班首白東階升殿舍人接引  
同升詣香案前搢笏上香跪奠茶訖執笏興降階復位又再拜次  
引班首以下分左右搢笏行香宰相執政官分左右行香訖執笏  
俱復位次引班首升殿詣香案前俛伏跪搢笏執爐俟讀疏畢執  
笏俛伏興降階復位又再拜退中興之制忌日百僚行香在外州  
軍亦詣寺院行香如在以日易月服制之內竝依禮例權停大祥  
後次年於曆日內箋注立忌辰禁音樂一日紹興元年二月太常  
少卿蘇遲等以徽宗欽宗留北有朔望遙拜之禮乃言凡遇祖宗  
帝后忌前一日并忌日皇帝自內先服紅袍遙拜訖易服行禮從

之二年八月詔應諸路州軍見屯軍馬統兵官每遇國忌免行香  
十三年正月御史臺言正月十三日欽聖憲肅皇后忌其日立春  
準令諸臣寮及將校立春日賜幡勝遇稱賀等拜表忌辰奉慰退  
卽戴欲乞候十三日忌辰行香退卽行戴插從之三十二年六月  
禮部侍郎金安節等言六月二十八日欽慈皇后忌辰係在淵聖  
皇帝以日易月釋服之外百官行香宜如常制詔依三十二年正  
月禮部太常寺言已降旨欽宗祔廟翼祖當遷於正月九日告遷  
翼祖皇帝簡穆皇后神主奉藏于夾室所有以後翼祖皇帝忌及  
諱簡穆皇后忌欲乞依禮不諱不忌詔恭依淳熙元年十一月詔  
文武百寮詣景靈宮國忌立班行香自今如遇宰執俱致齋不及  
趁赴于東班從上引官一員升殿跪爐行香以次官一員詣西班  
行香先是閣門得旨國忌行香宰執致齋不赴其西壁武臣闕官

押班已降指揮差使相或太尉節度使等押班可令文武班內班上一員東壁押班止令西壁散香今後準此至是禮部太常寺重別指定來上故有是命四年十月太常少卿齊慶胄言每遇國忌文武班列莫敢不肅唯是武臣一班員數絕少或以疾病在告多不趁赴詔閣門御史臺申嚴行下如有違戾彈劾聞奏九年十月御史張太經奏比來國忌行香日分合赴官類多託疾在告以興拜跪之勞乞自今如遇行香日有稱疾託故不赴者從本奏乞置典憲從之

私忌開寶敕文應常參官及內殿起居職官等自今刺史郎中將軍以下遇私忌請準式假一日忌前之夕聽還私第其後有司言臣僚忌日恩賜其間甚有無名者如劉繼元李煜劉鋹之類皆身爲降俘忘沒已久而尚霑恩賜及周朝忌日尚有追薦本朝

亦有追尊皇后生日道場并諸神祠亦有爲生日者請付禮官詳議不經之物一切省去詔周朝忌日仍舊餘罷之

宋史卷一百二十三

終